

周易引經通釋

周易引經通釋

黃岡李鈞簡輯註 男澍滋校字

周易上經

三三三 坎下
坤上

師貞丈人吉无咎

師王旅暉暉如江如漢案師之丈從自地之高也

從而倒古之字爲而水之行也以地容水如以將

統軍此師卦立義之意也 **周禮**大司馬凡制軍萬

有二千五百人爲軍二千有五百人爲師五百人

為敵師取用象之義 **師** 師人也言師者兼子軍

旅之稱 **丈** 丈者長也長則能率眾也 **丈** 丈

丈人以杖荷葆丈人年長者之稱 **雖** 雖無老成人

尚有典型是丈人之謂也子夏易傳作大人案大

人則屬君立卦之義指將兵之臣將帥用兵必歷

練而更事故稱丈人 **維** 維師尚父時維鷹揚 **又** 方

叔元老克壯其猷皆取老成之義也 **左** 傳穆公謂

蹇叔曰中壽爾墓之木拱矣秦誓之悔即不用丈

人之語也

衆曰師衆也貞正也能以衆正可以王矣

大學詩云殷之未喪師克配上帝儀監于殷峻命

不易道得衆則得國失衆則失國故曰師衆也

子行一不義殺一不辜而得天下不爲也故曰貞

正也**左傳**凡師能左右之曰以此以之之義也

爾尙一乃心力其克有勲能以衆正之謂也**孟子**

征之爲言正也能以衆正王者之師也**左傳**以此

衆戰誰能禦之共力不足恃也**孟子**保民而王莫

之能禦也其德可以王矣

剛中而應行險而順以此毒天下而民從之吉又何咎矣

師有嚴有翼共武之服本嚴敬以共武事剛中而應者將所以受任之道也**師**用或無畏一德一心

禮記軍旅思險隱情以虞行危道而順人心行險而順者將所以與師之義也**左傳**兵凶器戰危事

也故曰毒**左傳**兵民之殘也財用之蠹與師不無

害於天下以此毒天下見王者不得已之用也**書**

弗忍荼毒王者救民之師如藥之攻毒**周禮**凡療

瘍以五毒攻之安天下而曰毒猶治亂而曰亂也

孟子其君子實玄黃於筐以迎其君子其小人簞

食壺漿以迎其小人此民從之義也**書**朕夢協朕

卜襲于休祥戎商必克戰之必勝者所謂能以衆

正也故既曰吉矣又曰何咎

象曰地中有水師君子以容民畜衆

孟子水由地中行此地中有水之象安流順道所

以取義於師也**左傳**容之如地容民之象取諸地

也**周禮**以瀦畜水畜衆之象取諸水也**周禮**大司

徒五家爲比五比爲閭四閭爲族五族爲黨五黨
爲州五州爲鄉此容民之制也周禮小司徒五人
爲伍五伍爲兩四兩爲卒五卒爲旅五旅爲師五
師爲軍此畜衆之制也穀梁傳古者天子封諸侯
其地足以容其民其民足以滿其城以自守也此
言所以容民之義周禮以軍旅同邦國大師之禮
用衆也大均之禮恤衆也大田之禮簡衆也大役
之禮任衆也大封之禮合衆也此言所以畜衆之
義古者寓兵於農四邱出甲容民畜衆卽井田之

制也

初六師出以律否臧凶

爾雅律法也坎律銓也水平故主法律者用兵之

法也**周禮**大司馬以九伐之灋正邦國此師出有

名之律**禮記**行前朱鳥而後玄武左青龍而右白

虎招搖在上急繕其怒此軍行有紀之律**周禮**中

春教振旅以教坐作進退疾徐疏數之節中夏教

芟舍中秋教治兵中冬教大閱此蒐狩教閱之法

禮記不愆于六步七步乃止齊焉不愆於四伐五伐

六伐七伐乃止齊焉此戰陳擊刺之法皆所謂律

也**周禮**大師執同律以聽軍聲而詔吉凶亦師出

以律之餘義也**爾雅**臧善也臧卽以律之謂**國語**

夫師郤子之師也其事臧是師之善者也**左傳**凡

諸侯有命告則書師出臧否亦如之臧爲吉否臧

爲凶也**左傳**吳子使其弟蹶由犒師楚人執之曰

女來卜吉乎對曰國之守龜其何事不卜一臧一

否其誰能常之出師之道當謹其始臧否爲吉凶

新由不可不慎也**左傳**晉師救鄭荀林父將中軍

及河欲還彘子以中軍佐濟知莊子曰此師殆哉
周易有之在師之臨曰師出以律否臧凶執事順
成爲臧逆爲否衆散爲弱川壅爲澤有律以如已
也故曰律否臧且律竭也盈而以竭天且不整所
以凶也不行之謂臨有帥而不從臨孰甚焉此之
謂矣果遇必敗彘子尸之雖免而歸必有大咎韓
獻子謂桓子曰彘子以偏師陷子罪大矣子爲元
帥師不用命誰之罪也此正解初爻之義彘子以
中軍佐濟有帥不從彘子尸之五爻之所謂長子

帥師弟子與尸其義益明矣

象曰師出以律失律凶也

作師晉侯之弟揚干亂行於曲梁魏絳戮其僕亂

行卽失律之謂也 **論語**以不教民戰是謂棄之不

教而戰所以失律 **書**左不攻于左女不恭命右不

攻于右女不恭命御非其馬之正女不恭命用命

賞于祖不用命戮于社子則孥戮女不恭命而孥

戮者言失律之凶也古之用師者賞罰必嚴此於

初言失律之凶上言有命之賞仁至而義盡矣

九二在師中吉无咎王三錫命

詩左旋右抽中軍作好在師中之謂也**詩**文武吉

甫萬邦為憲**又**王命召虎來旬來宣奮武之時皆

本耀德之意是在師中吉者也**爾雅**錫賜也**左傳**

王使宰周公錫齊侯命**又**王使內史過錫晉侯命

此錫命之義也**周禮**典命掌諸臣五等之命如車

旗衣服之類**詩**王命召虎釐爾圭瓚秬鬯一卣告

于文人錫山土田於周受命自召祖命三章節三

錫命之義也

象曰在師中吉承天寵也王三錫命懷萬邦也

詩何天之寵卽承天寵之義 **書**惟其克相上帝寵

綏四方君寵卽天寵恭行天罰以承天寵體其仁

愛非僅邀其恩榮也 **論**大邦畏其力小邦懷其德

中庸懷諸侯則天下畏之統之曰懷萬邦不以兵

力維天下也

六三師或輿尸凶

左傳知莊子射連尹襄老獲之遂載其尸是輿尸

之謂也敗則有輿尸之象故凶又輿尸程傳訓衆

主左傳聽與人之誦是與爲衆之義也詩誰其尸

之是尸爲主之義也周禮夏官與司馬上士八人

左傳無令與師淹於君地衆之稱與在師尤有明

文以彘子尸之之文推之其義尤合

象曰師或輿尸大无功也

周禮戰功曰多无功而曰大者左傳大奔曰敗績

此之謂也禪將之喪師即主帥之无功左傳城濮

之戰左師右師敗子玉之中軍不敗楚殺子玉敗

師之罪子玉當之是已

六四師左次无咎

周禮掌次師田則張幕言次之地也**左傳**凡師一

宿爲舍再宿爲信過宿爲次言次之時也**穀梁傳**

次止也有畏也言次之意也**左傳**師次于郎師次

于召陵皆次之義也**禮記**軍尚左卒尚右左陽主

生右陰主殺左次貴不敗績也**左傳**四月諸侯伐

鄭門於東門晉荀罃至於西郊衛孫林父侵其北

鄙六月諸侯會於北林右還次於瑣圍鄭觀兵於

南門鄭人懼乃行成次以右爲進則左爲退也

象曰左次无咎未失常也

左師軍志曰允當則歸知難而退有德不可敵又見可而進知難而退武之善經也志與經之語皆常道也故曰未失常

六五田有禽利執言无咎長子帥師弟子與一貞凶

田獵四時之田皆爲宗廟之事也春曰田夏曰

苗秋曰蒐冬曰狩取獸於田曰田**周禮**獸人掌罍

田獸及辨田令禽注于虞中故曰田有禽利執言

禮記迎貓爲其食田鼠也迎虎爲其食田豕也田

有禽而害稼者亦利執之 **○**食我場苗繫之維之

此有禽利執之義也禽之害稼者執之寇之害民

者除之 **左傳**失禮違命宜其為禽也軍中獲訊亦

取義於禽者以此 **書**奉辭伐罪執言之義也 **書**千

夫長百夫長千夫百夫皆有長統全師者所以為

長子也 **公羊傳**將尊師眾稱師尊之故曰長子 **左**

傳帥師者受命於廟帥師師中之主也 **禮記**軍旅

什伍同爵則尚齒而弟達於軍旅矣弟子必聽命

於長子也委任不專若晉莒子之屬雖正而有撓

敗之凶也

象曰長子帥師以中行也弟子與尸使不當也

左傳師直爲壯**又**師克在和中之義如是**禮記**

天子乃命將帥選士厲兵簡練桀俊專任有功以
征不義使不當者任長子之不專而有弟子之敗

也**書**番番良士旅力既愆我尙有之仡仡勇夫射

御不違我尙不欲觀秦誓之悔不可見使不當之

義哉**左傳**晉侯使大子申生伐東山臯落氏此亦

長子帥師之謂其後奚齊卓子之立弟子之凶害

於而國矣可不慎與

上六大君有命闕國承家小人勿用

周禮大司馬師若有功懽樂獻於社大君有命論

功行賞之時也**左傳**慶賞行威曰君故曰大君有

命錫命在行師之始有命在行師之終**書**大告武

成列爵惟五分土惟三此闕國承家之義也**書**惇

信明義崇德報功必有德與功者崇而報之即小

人勿用之義也小人在用師之時即宜以使不當

爲戒至師終而勿用者**禮記**用人之智去其詐用

人之勇去其怒用人之仁去其貪棄短取長在一

時定功行賞在萬世大君於此必慎之也

象曰大君有命以正功也小人勿用必亂邦也

書功懋懋賞賞所以酬功也**周禮**司勳掌六鄉賞

地之適以等其功凡賞無常輕重視功此正功之

義也**書**丕視功載記功之載籍所謂以正功者**周**

禮軍將皆命卿師帥皆中大夫旅帥皆下大夫

國者諸侯之封承家者大夫之采因位賞功錫命

有加也**左傳**城濮之戰振旅愷以入于晉獻俘授

敵飲至大賞徵會討貳殺舟之僞以徇于國君子
 謂文公其能刑矣詩云惠此中國以綏四方不失
 刑賞之謂也此雖霸者之師振旅之時賞刑並用
 小人亂邦之義可以觀矣左傳有大功而無貴仕
 其人能靖者與有幾此卽亂邦之小人也知其必
 亂邦而勿用大君之思深慮遠有進於此者矣

三三坤下
 三三坎上

比吉原筮元永貞无咎不寧方來後夫凶

書江漢朝宗于海禮記四瀆視諸侯水歸地有覲

君之象所以爲比 **周禮** 比小事大以和邦國比有
親輔和合之義也案文二人爲从反从爲比从以
正合比以邪合立卦之義則有正有邪在人之所
從也 **禮記** 一人有慶兆民賴之比之吉也 **爾雅** 原再
也 **禮記** 蔡原蠶者 **禮記** 未有原皆再之義也 **論語**
君子之於天下也無適也無莫也義之與比比之
所以自筮者其義如此 **公羊傳** 求吉之道三故象
曰初筮比曰原筮 **禮記** 謀及乃心謀及卜筮謀及卿
士謀及庶人龜從筮從卿士從庶民從是之謂大

同身其康強子孫其逢吉謀者所以自審原筮之

義也謀之大同合乎天理人心之正元永貞之義

也康強逢吉无咎之義也**用禮**毋或若女不寧侯

不寧不相比者也**出**幹不庭方卽不寧方之謂**出**

先王既勤用民德懷爲夾庶邦丕享作兄弟方來

此方來之義也**出**昔有成湯自彼氐羌莫敢不來

享莫敢不來王不寧方來則四方無不來矣**出**

大司馬建大常比軍衆誅後王者後夫則外於比

也**出**禹致諸侯於會稽之山防風氏後至戮之

其骨專車此後夫之凶也

彖曰比吉也比輔也下順從也

爾雅弼柴輔比備也此比爲輔之義也**大學**堯舜

帥天下以仁而民從之桀紂帥天下以暴而民從之其所令反其所好而民不從下之所以順從在

上之所以原筮者可知矣**詩**王此大邦克順克比

親附其民是順從之義也**孟子**多助之至天下順

之可以見比輔之效**左傳**天子有公諸侯有卿卿

置側室大夫有貳宗士有朋友庶人工商阜隸牧

困皆有親暱以相輔佐也善則賞之過則匡之患
則救之失則革之觀此則知比孚之吉比匪之傷
故曰比者輔也

原筮元永貞无咎以剛中也
不寧方來上下應也後
夫凶其道窮也

剛中者宅中圖治也其自時中又九五在上之爲
君是也上下應者人所歸往也論語與滅國繼絕世
舉逸民天下之民歸心焉上下五陰之應是也道
窮者仁德去順效逆上六之爲後夫是也也自貽

伊阻道窮之謂也。孟子爲不順於父母如窮人無所歸不得於君其窮亦如是矣。

象曰：地上有水，比先王以建萬國，親諸侯。

孟子：民之歸仁也，猶水之就下，水比於地是其象。

也。周禮：形方氏掌制邦國之地域而正其封疆，使

小國事大國，大國比小國，建國之所以爲比也。

傳：天子建德，因生以賜姓，胙之土而命之氏，此親

侯之本於建國者也。不傳：禹會諸侯於塗山，執玉

帛者萬國，萬國亦槩言之。周禮：凡四海之內九州

千七百七十三國此建國之義也

禮記

天子同姓

謂之伯父叔父異姓謂之伯舅叔舅親侯之所以

爲此也

周禮

大行人掌大賓之禮及大客之儀以

親諸侯

又

大宗伯以服膳之禮親兄弟之國以賀

慶之禮親異姓之國此皆親諸侯之義也

禮記

禮

五服至于五千州十有二師外薄四海咸建五長

古者有分土無分民比之爲義卽封建之制也

禮記

禮記必則古昔稱先王易凡言先王者皆立法定制

萬世不易之事也

初六有孚比之无咎有孚盈缶終來有它吉

雷 一人有事于四方若卜筮罔不是孚卦曰原筮

元承貞无咎爻之初曰有孚比之无咎可以觀其

順從之實矣**爾雅** 盥謂之缶盥也**周禮** 盥實二鬮

瓦器淳質有實而盥孚之義也**穀梁傳** 來者接內

也故曰終來初不與五應而誠信所感終有他吉

者**詩** 他山之石可以爲錯他山之石可以攻玉卽

他吉之義也

象曰比之初六有他吉也

論語 因不失其親亦可宗也直舉初六言比道當
謹之於始可要之於終也 **論語** 居是邦也事其大
夫之賢者友其士之仁者是有他吉之義也

六二比之自內貞吉

詩 子曰有疏附子曰有先後此臣之比於君者所
謂比之自內也 **左傳** 兼名委贄貳乃辟也故曰貞

吉 **書** 立愛自親始立敬自長始此比之以親為自
內也 **左傳** 擇善而從之曰比此比之以德為自內
也

象曰比之自內不自失也

孟子古之人未嘗不欲仕也又惡不由其道不自
失之義也孟子御者且羞與射者比比而得禽獸
雖若邱陵弗爲也故曰不自失

六三比之匪人

論語君子周而不比小人比而不周比之公者爲

周比之私者爲比小人卽匪人也禮記天臣不治

而遵臣比矣所謂匪人也書凡厥庶民無有淫朋
人無有比德惟皇作極顯比之世不能無比匪者

是戒人之比匪而欲人之從上也二應於五四近
於五皆以君臣之義言之初之比乎三之比匪則
亦各有取也

象曰比之匪人不亦傷乎

畫昵比罪人又比頑童如此者豈非比匪之傷乎
禮記聖人作爲禮以教人使人以有禮知自別於
禽獸禽獸則匪人矣比之匪人與否之匪人同辭
傷之爲言戒之甚也

六四外比之貞吉

四舍初而近於五左傳出而圖吾君外比之義也
國語叔向曰君子比而不別比德以贊事比也引
黨以封已別也利己而忘君別也比之爲正別則
非正外比之所以貴貞吉也

象曰外比于賢以從上也

孟子天下有道小德役大德小賢役大賢比五之
賢從上之義也以德則曰賢以位則曰上公羊傳
其言從王伐鄭何從王正也從王即從上之謂所
以明貞吉之義也

九五顯比王用三驅失前禽邑人不誠吉

書光于四方顯于西土顯比之義穀梁傳王者民

之所歸往也是所謂顯比者**書**罔違道以干百姓

之譽罔哂百姓以從己之欲我非私比而比我者

亦無私是謂顯比**書**無偏無黨王道蕩蕩無黨無

偏王道平平顯比而無私之義也**禮記**天子不合

圍開一面者也故曰王用三驅**周禮**虞人萊所田

之野為表百步則一為三表田之日中軍以鼙合

鼓司馬振鐸羣吏作旗鼓行鳴鐻車徒皆行及表

乃止三鼓擁鐸羣吏弊旗車徒皆坐又三鼓振鐸
作旗車徒皆作鼓進鳴鐸車驟徒趨及表乃止坐
作如初乃鼓車馳徒走及表乃止乃鼓退鳴鐸且
卻及表乃止坐作如初三表之進正三驅之義也

左傳千乘三去三去之餘獲其雄狐三去與三驅

同獲其首惡則失者多也**穀梁傳**過防弗逐不從

奔之道也面傷不獻不成禽不獻禽雖多天子取

三十焉不多取者失前禽之義也**禮記**君親誓社

以習軍旅而流示之禽而鹽諸利以觀其不犯命

也求服其志不貪其得故以戰則克以祭則受福
此卽失禽不誠之義圖徒御不驚大庖不盈邑人
不誠者私屬之人不待告誡而皆喻上意是其義
也孟子歸市者不止耕者不變亦可推邑人不誠
之義矣左傳軍政不戒而備王者之師義正如是
象曰顯比之吉位正中也舍逆取順失前禽也邑人
不誠上使中也

書皇建其有極會其有極歸其有極位之正中所
以顯比周禮狩田旣陳乃設驅逆之車有司表貉

于陳前驅禽使趨田者其去者亦聽之卽舍逆取
順之意也**田**相彼投兔尙或先之禽之來投者不
逆而射之此之謂舍逆也**禮記**前有擊獸則載貔
貅禽之背走者則順而搏之此之謂取順也取舍
皆其所自取亦顯比之義也**孟子**芻蕘者往焉雉
兔者往焉邑人不誡其象如此觀感於上者深也
聞不識不知順帝之則**孟子**王者之民皞皞如也
上使中者莫知其然而然如或使之也

上六比之无首凶

左傳無爲戎首戎則不宜爲首比則不宜居後
衆非元后何戴无首卽後夫之凶也陽爲陰首乾
之无首陽變爲陰剛而能柔也故吉比之无首陰
不從陽坤之先迷也故凶

象曰比之无首无所終也

易第六爻在上則爲首在後則爲終陰柔在上無
所適從**左傳**畏首畏尾身其餘幾故无首而又无
終也**穀梁傳**朝服雖敝必加於上弁冕雖舊必加
於首周室雖衰必先諸侯比不可以无首明尊君

之義也。**孟子**楊氏爲我是無君也墨氏兼愛是無父也皆所謂无首之凶者

三三三 乾下 巽上

小畜亨密雲不雨自我西郊

書厥土黑墳厥田惟中下案畜之文從玄從田象

水之汗下者乾之色玄在下爲田是也。**孟子**制其

田里教之樹畜畜有養之義也。**周禮**以瀦畜水畜

有止之義也皆取象於田。**孟子**齊景公召大師曰

爲我作君臣相說之樂其詩曰畜君何尤畜君者

好君也以陰畜陽如以臣畜君畜之義也陰為小

而風主散故畜之力小而畜之道亨穀梁傳春正

月不雨者勤雨也夏四月不雨者閔雨也閔雨者

有志乎民者也不雨之義畜之未至者也文王有

志乎民者故其自言如此禮記迎秋於西郊西郊

陰方陰倡而陽不和故以西郊為象也詩朝濟于

西崇朝其雨虹氣自西而上升則為雨微雲氣自

西而東行則為不雨之象視乎陰陽之有應有不

應也詩乃穆考文王肇國在西土厥誥誌庶邦庶

士越少正御事文王之澤欲東被三州而不得密
雲不雨自我西郊亦有愷言之也

象曰小畜柔得位而上下應之曰小畜

柔得位者以陰居柔為得位四近君亦為得位而

下位卑而言高罪也柔之所以貴乎得位也

君子信而後勞其民未信則以為厲己也信而後

諫未信則以為謗己也六四為卦之主爻上下所

以應之者以其有孚也

四請共爾位正直是與應
之之義以此

密雲不雨尚往也自我西郊施未行也

論語天油然作雲沛然下雨密雲則宜有雨而風之散者雲不固陽之所以尚往也**詩**其雨其雨杲

杲出日陰盛所以止陽尚往則陽氣上進故不雨

禮記上不酌民言則下不天上施施而未行志之

所以不得也乾象傳曰雲行雨施密雲不雨故曰

施未行**論語**諫則不行言則不聽膏澤不下於民

施未行者亦屯膏之意也

象曰風行天上小畜君子以懿文德

左傳夫舞所以節八音而行八風風應八節此風

行天上之象也畜有畜養畜止二義**詩**凱風自南

吹彼棘心棘心天天母氏劬勞如母之畜子而劬

勞此風行天上而能養物之義也**左傳**六鷁退飛

過宋都風也**國語**爰居止於魯東門之外是歲海

多大風如鳥之過風而退避此風行天上而能止

物之義也**爾雅**懿善也畜德所以爲善**詩**好是懿

德卽文德也**詩**柔嘉維則令儀令色亦德之有文

者威儀文辭皆是也所畜者小故曰以懿文德如

之風行地上曰施命誥四方小畜之風行天上曰懿文德**困**矢其支德洽此四國施而未行之義也
初九復自道何其咎吉

一陽在下爲復此則乾卦在下故初二皆曰復也
復如**論語**復其位之復陽志上進爲陰所畜復於
在下之位而不進也**困**爾不我畜言歸思復所謂
復自道也**中庸**誠者自誠也而道自道也自盡其
道謂之自道**孟子**我竭力耕田共爲子職而已矣
父母之不我愛於我何哉循分而自責是復自道

何其咎之義也非无咎之謂也**雷**發言盈廷誰敢執其咎曰何其咎亦自任之義也故吉

象曰復自道其義吉也

禮記善則歸君過則歸己復而自任其咎自盡之道是事上之義也故曰其義吉**孟子**如知其非義斯速已矣何待來年復自道者知所畜之正亦其義吉之謂也

九二率復吉

牽如**左傳**率率老夫以至於此之牽與初九牽連

而復者亦吉道也 **禮記**君子之教喻也道而勿盡
牽逼之意義亦相同

象曰牽復在中亦不自失也

孟子強而後可牽復之意也 **中庸**或勉強而行之

及其成功一也復雖牽於人而剛中之德在己故

初曰義吉二曰亦不自失承上爻而言也

九三與說輻夫妻反目

周禮輻也者以為直指也輪輻三十以象日月象

其運行也故於乾取之 **詩**無棄爾輔員于爾輻輔

以益輻說輻則甚於棄輔矣左傳車說其輻不利
行師是其義也論語大車無輓小車無軌其何以
行之哉說輻則進不利於行矣詩順勉同心不宜
有怒反目則退不安其室矣孟子其妻歸與其妾
訕其良人而相泣於中庭此反目之象也初二之
復自止也九三則妄行取困者矣

象曰夫妻反目不能正室也

左傳男有室女有家不正室者孟子身不行道不
行於妻子是也

六四有孚血去惕出无咎

孟子不信於友弟養於上矣至誠而不动者未之

有也以陰畜陽本有傷害憂懼之理積誠之感則

可免而无咎故曰有孚血去惕出也**大戴禮**血者

猶血憂色也**詩**予手拮据予口卒瘡予羽譙譙予

尾脩脩侮予之傷漂搖之患所謂血與惕也**詩**狼

跋其胡載寔其尾公孫碩膚赤舄几几至是則血

去惕出矣周公之歸相成王正有孚无咎之義也

象曰有孚惕出上合志也

書亂爲四方新辟作周恭先子且以多子越御事
篤前人成烈答其師作周孚先上合志之謂也

九五有孚學如富以其鄰

爾雅衣襦謂之視注衣襦也齊人謂之學是衽之
相聯者學之義也詩我心蘊結兮蘊結卽學如之
意書臣哉鄰哉鄰哉臣哉君以臣爲鄰也書于違
汝弼汝無面從退有後言欽四鄰君有孚信則其
臣以類應所謂以其鄰也書昔君文武丕平富不
務咎底至齊信用昭明于上下則亦有熊羆之士

不二心之臣保父王家文武之道大而才德之臣
爲之輔此富以其鄰之義大學富潤屋德潤身心
廣體胖故君子必誠其意誠積於中所以爲富

象曰有孚樂如不獨富也

論語德不孤必有鄰孤則獨矣有孚樂如者能以
其鄰故曰不獨富書先王于惠困窮民服厥命罔
有不說並其有邦厥鄰德之及於民者亦可徵不
獨富之義左傳弃同卽異是謂離德詩曰協比其
鄰婚姻孔云晉不鄰矣其誰云之六四之有孚積

誠以感其上九五之有孚推誠以待其下日上合志日不獨富同德爲鄰攀如之實也

上九既雨既處尙德載婦貞厲月幾望君子征凶

詩習習谷風以陰以雨陰陽和而後雨澤降夫婦

和而後家道成既雨之義也詩乃如之人兮逝不

古處古處謂同德齊意夫婦得所既處之義也既

者皆言其畜極而通也左傳敬德之與也所以日

載論語尙德哉若人尙德載與與說婦者異矣儀

禮夫婦一體婦貞厲與夫妻反目者異矣詩婦有

長舌維厲之階不貞則厲貞而猶厲者戒辭也
爾雅幾近也儀禮日幾中而禮成月幾望與日幾中
同義禮記讓之三也象月之三日而成魄也既望
之後以生魄爲退幾望之前以生明爲進知月之
讓明則知幾望之義矣禮記三五而盈三五而闕
幾望則將盈之象陰之盛也商極固爲可通之時
而陰盛亦有抗陽之警詩周公東征四國是皇哀
我人斯亦孔之將處盛滿而恐懼卽君子征凶之
義亦貞厲之戒也日旣雨矣又日幾望日旣處矣

又曰貞厲曰德載矣又曰征凶妻道臣道无成有終小畜之義固如是也

象曰既雨既處德積載也君子征凶有所疑也

禮記積焉而不苑蘊結之久而後通德之積也
大戴禮天地積陰温則爲雨寒則爲雪積而後通故
日德積載也禮記尸在廟門外則疑於臣君在廟
門外則疑於君有所疑者所處之地有疑卽陰疑
于陽之謂也亦惟終積其誠而已

三三 兌下
乾上

履虎尾不咥人亨

禮記王者袞冕以象天天在上爲冠之象則澤在下爲履之象承天而言也左傳衣裳劍履案履之文上從尸人字也中從舟象所以載也此卽天澤之義左從彳右從夂行之象也在服物爲履是實字義卦名則以履物爲義爾雅履禮也禮爲人之所當踐履此正義也詩履帝武敏歆躋其後而蹠之亦謂之履書心之憂危若蹈虎尾履虎尾之象也履本安行之義連虎尾言而不單爲卦名者以

明其辭之危而義之險履順易而履變難也若否
同人艮皆各有其義**詩**不敢暴虎所謂和說以躡
剛強之後處危而不傷不啞人之亨也啞人者虎
履尾者人人之不啞所以重人事也

彖曰履柔履剛也

履剛與履柔不同履柔則宜以剛制之履霜之戒
防於未然**論語**人無遠慮必有近憂是其義也履
剛則宜以柔制之履虎之戒防於已然**孟子**孔子
道宋桓司馬將要而殺之微服而過宋是其義也

說而應乎乾是以履虎尾不咥人亨

闕祖弼暴虎將叔無狙戒其傷女**孟子**晉人有馮婦者善搏虎卒爲善士有衆逐虎虎負嵎莫之敢撻望見馮婦趨而迎之馮婦攘臂下車衆皆悅之其爲士者笑之不習乎剛猛之素而守以和說之常則爲悅而應乎乾共叔馮婦皆不知此義者也

剛中正履帝位而不疚光明也

孟子踐天子位焉履帝位之義也**左傳**賜我先君履東至於海西至於河南至於穆陵北至於無棣

以此推之王者撫有之地皆謂之履亦履帝位之義也。論語內省不疚無惡於志是不疚之義也。論語慎乃在位此所以履而不疚者也。論語博施於民而能濟衆堯舜其猶病諸脩己以安百姓堯舜其猶病諸履帝位而不疚之難也。論語允恭克讓光被四表。又濬哲文明溫恭允塞堯舜之履帝位是有剛中正之德而能光明也。

象曰上天澤履君子以辨上下定民志

左傳君履后土而戴皇天上下澤之象也。左傳

天威不遠，顏咫尺，敢不下拜。上天下澤之義也。

傳臣之有君如衣服之有冠冕，冠履之分所以為

上下之辨也。**左傳**人有十等：王、臣、公、公、臣、大夫、大

夫、士、士、臣、阜、阜、臣、興、興、臣、隸、隸、臣、僚、僚、臣、僕、僕

臣、臺、辨上下者謂其等級分明。**左傳**其卿讓於善

其大夫不失守其士，競於教其庶人，力於農穡，工

商阜隸，不知遷業，定民志者謂其各有常分。**禮記**

禮達而分定，是履之大義也。**禮記**君臣上下父子

兄弟非禮不定，此辨上下定民志之謂也。**左傳**世

之治也君子尚能而讓其下小人農力以事其上
是以上下有禮而讒慝黜遠由不爭也謂之懿德
及其亂也君子稱其功以加小人小人伐其技以
馮君子是以上下無禮亂虐並生由爭善也謂之
昏德此辨上下定民志之所以取諸履也

初六素履往无咎

論語 繪事後素履之在初有素之義禮後之義卽
本於履也**中庸** 素富貴行乎富貴素貧賤行乎貧
賤素履之義也君子無入而不自得焉往无咎之

義也

象曰素履之往獨行願也

中庸君子素其位而行不願乎其外素履往者即

素位而行獨行願者即不願乎外 **禮記**不願於大

家亦不苟慕富貴之意 **大學**此之謂自謙故君子

必慎其獨也行者履之正願者意之誠獨行之履

非謂蹢躅涼涼絕世為高者也

九二履道坦坦幽人貞吉

詩周道如砥君子所履履道坦坦之義也 **詩**君子

子坦蕩蕩君子之心卽君子之行也
論語子游曰
有澹臺滅明者行不由徑非公事未嘗至於偃之
室也所謂幽人之貞吉也
禮記幽居而不淫言隱
處而自修整亦非遜世之稱

象曰幽人貞吉中不自亂也

論語富與貴不以其道得之不處也貧與賤不以其道得之不去也其中有主故不自亂
論語逸民
伯夷叔齊虞仲夷逸朱張柳下惠少連不降其志
不辱其身伯夷叔齊與謂柳下惠少連言中偷行

中慮謂虞仲夷逸身中清廢中權此皆中不自亂之幽人也

六三眇能視跛能履履虎尾噬人凶武人爲于大君

殺梁傳

晉郤克眇衛孫良夫跛同時而聘于齊齊

使眇者御眇者跛者御跛者此眇視跛履者也六

三不中不正視履之不全者故有此象 **禮記**孔子

過泰山側有婦人哭於墓者而哀問之曰昔者吾

舅死於虎吾夫又死焉今吾子又死焉此噬人之

凶也 **禮記**賞軍帥武人於朝武人有勇力者 **禮記**進

厥虎臣闕如哮虎虎之噬人所以比於武人順則
爲干城腹心逆則爲犯上作亂也論語弄善射界
盪舟俱不得其死然此所謂武人爲于大君者孟
子象不得有爲於其國爲于文法正相似
象日眇能視不足以有明也跛能履不足以與行也
噬人之凶位不當也武人爲于大君志剛也

孟子明足以察秋毫之末而不見輿薪爲不用明
焉眇本偏於明故日不足以有明論語力不足者
中道而廢今女晝跋本偏於行故日不足以與行

孟子小固不可以敵大弱固不可以敵強六三一

陰才小力弱以全卦而言曰不臣人亨以木爻而

言曰臣人凶其所處之位不當故也左傳不度德

不量力此位不當之義矣論語好剛不好學其蔽

也狂豈於剛而無制孟子無伊尹之志則篡也志

剛而至於篡亦可見履霜堅冰之漸矣

九四履虎尾愬愬終吉

公羊傳靈公望見趙盾愬而再拜愬愬蓋亦敬懼

之意論語子曰暴虎馮河死而無悔者吾不與也

必也臨事而懼好謀而成者也愬愬終吉之義與
武人爲於大君者異矣

象曰愬愬終吉志行也

〔論語〕子畏於匡曰天之未喪斯文也匡人其如予
何又〔天生德於予桓魋其如予何此愬愬之終吉
也以天自信卽其志之行也孟子北宮黜之養勇
也不膚撓不自逃思以一毫挫於人若撻之於市
朝孟施舍之養勇也曰舍豈能爲必勝哉能無懼
而已矣黜舍亦似行其志者而無以善其後持其

志無暴其氣此可知志行與志剛之分矣

九五夬履貞厲

書惟克果斷乃罔後艱夬履者人君之宜於剛決也孟子大人者行不必果惟義所在貞厲者人君之慎於措施也有中正之德而常存危厲之心是履帝位而不疚者可以決於履矣澤天爲夬故天澤亦取夬之義

象曰夬履貞厲位正當也

大學見賢而不能舉舉而不能先命也見不善而

不能退退而不能遠過也是不能操有位之權不
當乎夫扇之義也此謂唯仁人爲能愛人能惡人
知之明處之決故曰位正當也**論語**予無樂乎爲
君惟其言而莫予違也如其善而莫之違也不亦
善乎如不善而莫之違也不幾乎一言而喪邦乎
上剛下說恐君驕而臣諂能不以位爲樂此所謂
正當也

上九視履考祥其旋元吉

書若跣弗視地厥足用傷履必資於視視則慎其

所履至於考祥則與眇跛者相去遠矣爾雅祥善

也書作善降之百祥考祥者考其所行也孟子所

以考其善不善者於己取之而已矣此考祥之義

也禮記趨以采齊行以肆夏周旋中規折旋中矩

視履之吉者也禮記動容周旋中禮者盛德之至

也是謂其旋元吉左傳單襄公曰君子目以定體

足以從之是以觀容而知其心矣日以處事足以

步目目體不相從何以能久此即視履相因之義

象曰元吉在上大有慶也

詩靡不有初鮮克有終素履視其初始也考祥視其成終也**詩**率履不越元吉在上是有終也**詩**福履綏之福履將之福履成之大有慶之謂也**爾雅**履福也祿也故曰慶

三三
坤上 乾下

泰小往大來吉亨

孟子水由地中行素泰之文從大從才從彡從彳坎為通泰之義也**禮記**燔柴於泰壇祭天也瘞埋於泰折祭地也埋少牢於泰昭祭時也祭所以達

天地四時之氣天地之交是以爲泰於義爲通也

禮記大道之行也天下爲公選賢與能講信修睦

是謂大同此世之大同泰之義也**禮記**夫禮必本

於大一於文一大爲天天一之所以爲大也**周禮**

大宗伯之職掌建邦之天神人鬼地示之禮於文

二小爲示地二之所以爲小也**禮記**天氣下降地

氣上騰小往大來之義也吉亨所以爲泰

象曰泰小往大來吉亨則是天地交而萬物通也上

下交而其志同也內陽而外陰內健而外順內君子

而外小人君子道長小人道消也

周禮天地之所合也四時之所交也風雨之所會也陰陽之所和也然則百物阜安乃建王國焉是天地交而萬物通之義也**書**朕志先定詢謀僉同

又爾惟訓于朕志爾交脩予罔予棄是上下交而其志同之義也內陽外陰以氣言**禮記**陽而不散

陰而不密**左傳**冬無愆陽夏無伏陰是也內健外順以德言**論語**君子泰而不驕是也**禮記**秀士升

之司徒曰選士選士升之學曰俊士造士升諸司

馬曰進士以漸而進內君子之義也不帥教者移
之郊移之遂屏之遠方終身不齒以漸而出外小
人之義也**論語**舜有天下舉臯陶不仁者遠矣湯
有天下舉伊尹不仁者遠矣君子道長所以小人
道消也**公羊傳**不使小人加乎君子消長之權有
操之者也

象曰天地交泰后以財成天地之道輔相天地之宜
以左右民

國語董因迎公子於河公子曰吾其濟乎對曰臣

筮之得泰之八曰是謂天地配亨小往大來今及之矣何不濟之有配即交之謂也

以別幽明之混淆此言天地交泰所以明陰陽之

合德爾雅后君也說文以為繼體之君又案禮記

天子理陽道后治陰德天子聽外治后聽內職教

順成俗外和內順家理國治卦象惟泰與姤稱后

泰象曰天地交姤象曰天地相遇事非后所得專

義則與后同也

有成就德者有達財者皆所以裁之是財成之義也

皆所以助之是輔相之義也。中庸萬物並育而不
相害道並行而不相悖是所謂天地之道財成者
節宣其自然之氣也。禮記立春命相布德和令立
夏命樂師習合禮樂若此類者四時之令春夏秋
冬各有所宜。周禮大司徒山林其動物宜毛物其
植物宜阜物川澤其動物宜鱗物其植物宜膏物
職方氏青州其穀宜稻麥雍州其穀宜黍稷若此
類者九州之產南北東西各有所宜是所謂天地
之宜輔相者佐助其當然之事也。孟子夫君子所

過者化所存者神上下與天地同流豈曰小補之哉此所以裁成輔相之義也爾雅詔亮左右相導也詔相導左右助勵也是左右之義也書予欲左右有民女翼以左右民之義

初九拔茅茹以其彙征吉

論語舉直錯諸枉則民服泰之拔茅舉直也爾雅蒞牡茅茹則其根荇也爾雅彙毛刺叢生之類如之三陽在下有賢者連類而進之象如拔茅之同根而升書野無遺賢泰交之世有此象也孟子尊

賢使能俊傑在位則天下之士皆悅而願立於其朝矣以其彙之義也書荊州厥貢包匭菁茅此供祭祀之用茅之善者喻賢人也於泰之象取之在下卦卽內君子之謂也故曰征吉孟子孔子有見行可之仕征吉之義也

象曰拔茅征吉志在外也

孟子古之人得志澤加於民君子以天下爲任志在外之義也禮記天地四方者男子之所有事也故必先有志於其所有事然後敢用穀也此可以

知在外之志矣

九二包荒用馮河不遐遺朋亡得尙于中行

孟子土地荒蕪包荒者包容荒穢**左傳**山藪藏疾

川澤納汙是其義也**爾雅**馮河徒涉也用馮河者

果決剛斷**孟子**若決江河沛然莫之能禦也是其

義也**孟子**不忘遠不遐遺者庶事之必周也**書**官

不及私暱朋亡者相與之無私也包荒用馮河者

詩不剛不柔敷政優優是也不遐遺朋亡者**書**無

偏無黨遵王之道是也此謂得尙于中行也**論語**

不得中行而與之中行謂中道也。論語好仁者無以尚之中行故曰得尚也。

象曰包荒得尚于中行以光大也。

論語寬則得衆信則人任焉敏則有功公則說四者皆中道九二之德備之特舉包荒者左傳如天之無不幬如地之無不載聖賢之量所以體天地之心寬尤居上之本此爻之主義也中庸舜其大知也與舜好問而好察邇言隱惡而揚善執其兩端用其中於民大知所以爲光大也。

九三无平不陂无往不復艱貞无咎勿恤其孚于食
有福

爾雅大野曰平高平曰原廣平曰陸陂者曰阪地
勢有平有陂也**詩**昔我往矣楊柳依依今我來思
雨雪霏霏天時有往有復也平陂往復勢之必至
而理之固然也**書**后克艱厥后臣克艱厥臣艱者
君道臣道之正也故无咎**書**無疆惟休亦無疆惟
恤秦之將否休之有恤也**書**上下勤恤其日我受
天命丕若有夏歷年式勿替有殷歷年欲王以小

民受天永命。又我有周，卽受我不敢知。曰厥基永
孚于休，若天棐忱，我亦不敢知。曰其終出于不祥，
理勢之驗，皆曰孚勿恤其孚之義也。書制治於未
亂，保邦於未危，事之在人者，當盡則運之在天者，
可轉矣。故曰无恤其孚，書惟辟作福，惟辟作威，惟
辟玉食于食，有福之謂也。詩既醉以酒，既飽以德，
天子萬年介爾景福，于食有福者，保泰之義也。

象曰无往不復，天地際也。

孟子五百年必有王者興，其間必有名世者，時數

之交其間卽所謂際也天地相遇之際泰否反復之機自古及今凡際則有變易論語孔子曰才難不其然乎唐虞之際於斯爲盛所以獨爲泰交之隆天地不可多得之際孔子之歎有以也

六四翩翩不富以其鄰不戒以孚

詩翩翩者騅載飛載下三陰下復之象有似於鳥之翩翩而下也詩彼有旨酒又有嘉殽洽比其鄰昏姻孔云瓊瓊姻姪則無靡仕酒食依附而無其誠以固結不富以其鄰者也詩既夷既暉如相瞻

矣不待期約而歎然相與不戒以孚者也此皆小人之交泰之所以致否者也論語不戒視成謂之暴不戒者未嘗豫期之謂也

象曰翩翩不富皆失實也不戒以孚中心願也

詩緝緝翩翩謀欲譖人慎爾言也謂爾不信又彼

譖人者誰適與謀翩翩者小人輕儇之象故曰不

富無信則失實誰與謀即不戒以孚可見小人之

情狀矣小人害正而日中心願者大學人之彥聖

而違之俾不通寔不能容是也自下而進者取象

於草木**詩**枝葉未有害本實先撥茅茹則本實之
因也自上而下者取象於禽鳥**詩**瞻鳥爰止于誰
之屋鳥猶有擇翩翩者則處堂之燕雀而已

六五帝乙歸妹以祉元吉

誓自成湯至于帝乙紂父為帝乙也虞翻之說本

此荀爽以為湯執本義從之**左傳**宋公伐鄭晉趙

鞅卜救鄭陽虎以周易筮之遇泰之需曰宋方吉
不可與也微子啟帝乙之元子也宋鄭甥舅也祉
祿也若帝乙之元子歸妹而有吉祿我安得吉乃

止案此則前說爲是。雷東宮之妹。又。大邦有子倪天之妹。曰歸妹者。皆言其所出之貴也。爾雅祉福也。六五柔中。虛己降尊。從陽受禱之本也。詩曷不肅雝。王姬之車。不挾貴以驕。其夫家義如是。則元吉也。雷澤歸妹。此卦中四爻互體象之。孟子舜尚見帝。帝館甥于貳室。亦饗舜。迭爲賓主。是天子而友匹夫也。二爲臣位。舜尚見帝者。得尚于中行也。五爲君位。帝館甥者。帝乙之歸妹也。地天之交。泰取於歸妹者。觀堯舜之事。可以見泰交之至也。

象曰以祉元吉中以行願也

孟子 丈夫生而願爲之有室女子生而願爲之有家德全福備若此者尤男女之大願也曰中以行願者**詩**琴瑟友之鐘鼓樂之所謂性情之正而非宴好之私也

上六城復于隍勿用師自邑告命貞吝

詩實墉實壑城隍之謂也**爾雅**隍壑也虛也隍謂

城池之無水者**詩**高岸爲谷深谷爲陵泰極而否

城復于隍之義也**詩**懷德維寧宗子維城無俾城

壞無獨斯畏城之復卽城之壞也

左傳

王使富辛

與石張如晉請城成周天子曰昔成王合諸侯城

成周以爲東都崇文德焉今我欲徼福假靈於成

王修成周之城俾戍人無勤諸侯用寧蝥賊遠屏

晉之力也此所謂城復于隍勿用師自邑告命者

也處將否之時號令不行戒以勿用師所以全其

威也

書

王曰父義和其歸視爾師寧南邦文侯固

修扞我艱者平王之命亦勿用師之義

書商邑翼

翼

書其作大邑人主所居謂之邑

左傳

天王以王

子帶之難來告告命之謂也君臣之義正而天地之運乖是以謂之貞吝

象曰城復于隍其命亂也

論語天下有道則禮樂征伐自天子出天下無道則禮樂征伐自諸侯出蓋十世希不失矣自大夫出五世希不失矣陪臣執國命三世希不失矣城

復于隍由漸而頽命亂之象由漸而降**詩**訐謨定

命遠猷辰告命不及遠卽亂之源也**詩**我聞有命

不敢以告人不敢告者命之亂也告命者命之正

也命亂故復否告命亦撥亂反正之機也

☷☷☷
坤下
☰☰☰
乾上

否之匪人不利君子貞大往小來

詩民否則厥心違怨否則厥口詎祝素文否從口

從不口之所不然也轉為否塞之否 **詩**邦國若否

伸山甫明之否則其象為逆為暗是為閉塞之義

孟子無惻隱之心非人也無羞惡之心非人也無

辭讓之心非人也無是非之心非人也無人心則

非人道世之所以否也連言否之匪人者 **詩**下民

之孽匪降自天疇沓背憎職競由人否閉之世不能諉之天地之氣數皆由人之無良也**禮記**人者天地之德陰陽之交鬼神之會五行之秀氣也人者天地之心也五行之端也食味別聲被色而生者也人曰天地之德天地之心無人以治之則天地不通矣所以曰否之匪人**詩**不懲其心覆怨其正是不利君子貞也**大戴禮**陽窮反陰陰窮反陽是大往小來之義也

象曰否之匪人不利君子貞大往小來則是天地不

交而萬物不通也上下不交而天下无邦也內陰而外陽內柔而外剛內小人而外君子小人道長君子道消也

禮記天譴不交萬物不生是不通也**孟子**上下交

征利而國危矣是上下不交也**孟子**不信仁賢則

國空虛此其所以无邦也**孟子**君子之厄於陳蔡

之間無上下之交也不利君子貞是以無上下之

交此亦天下无邦之義**國語**天地之氣不失其序

若過其序陽伏而不能出陰遁而不能蒸於是

地震今三川震是陽失其所而鎮陰也。內陰外陽失其所也。**論語**色厲而內荏內柔外剛失其道也。**昔**君子在野小人在位內小人外君子失其職也。**左傳**惡直醜正實繁有徒小人道長所以君子道消也。**詩**彼候人兮何戈與祿彼其之子三百赤芾。此亦自為倒置者矣。

象曰天地不交否君子以儉德辟難不可榮以祿

爾雅天氣下地不應曰冓地氣發天不應曰霧霧謂之晦此天地不交之象也。**禮記**天氣上騰地氣

卷之八 禮記

下降天地不通閉塞而成冬此天地不交之所以
 為否也 **雷**慎乃儉德惟懷永圖儉約之德敬慎自
 斂之意 **禮記**君子慎以辟難蓋謂此也 **論語**邦無
 道穀恥也以為恥則不以為榮矣 **左傳**驕者淫佚
 所自邪也四者之來寵祿過也否之時如此君子
 是以鑒之 **左傳**介之推不言祿祿亦弗及其母曰
 亦使知之若何曰身將隱焉用文之 **心**亦不可榮
 以祿者也即所謂天地閉賢人隱者是也

初六拔茅茹以其彙貞吉亨

小人違節亦以茅茹言者**論語**舉枉錯諸直則民不服否之拔茅舉枉也**孟子**山徑之蹊間介然用之而成路爲閒不用則茅塞之矣小人道長所謂茅塞也曰貞吉者**詩**采葑采菲無以下體取其有用之材初之惡猶未形向莖改於其德也說者謂否之拔茅亦屬君子如屬小人豈有貞吉之理此不然也**出**庶頑譏說若不在時候以明之撻以記之書用識哉欲並生哉工以納言時而颺之格則承之庸之否則威之庶頑者茅之葉也侯明達記

書識工納者以其乘之義也欲並生者望其貞吉

也承之庸之豈不與泰之征吉同哉 **左傳**雖有絲

麻無棄菅蒯凡百君子莫不代匱天地之數有否

運聖人之心無棄材可明貞吉亨之義矣 **詩**英英

白雲露彼菅茅此言茅之亂菅是茅之惡者喻小

人也於否之象取之在下卦即內小人之謂也

象曰拔茅貞吉志在君也

左傳臣竭股肱之力加之以忠貞乃所謂志在君

者 **孟子**仕則慕君又事是君則為容悅者也徒志

在君則失其事君之正矣

六二包承小人吉大人否亨

小人之欲容順君子 **論語** 王孫賈曰寧媚於寵又

陽貨欲見孔子饋孔子豚或引以為援或藉以自

重其所謂吉正大人之否也故大人自安於否 **論**

語 予所否者天厭之天厭之古注以為否塞之義

是大人之否也 **孟子** 彌子謂子路曰孔子主我衛

卿可得也孔子曰有命 **又** 魯平公將出嬖人臧倉

者沮君孟子曰吾之不過魯侯天也不為小人所

容順者亨之道也。**論語**子曰知我者其天乎。**孟子**
孟子曰吾何爲不豫哉時之否不害其道之亨也
象曰大人否亨不亂羣也

論語憂心悄悄愠于羣小小人成羣誠足愠也不亂
羣者守道之正也。**論語**子曰不曰堅乎磨而不磷
不曰白乎涅而不緇不亂羣之義如是而後至也

孟子雖袒裼裸裎於我側爾焉能浼我哉亦有其
所以不亂者矣

六三 包羞

左傳包藏禍心包之為義如此欲傷善而未能者也
孟子羞惡之心人皆有之其良心必有不能盡
沒者故曰包羞 **國語**成公之歸也晉之筮也遇乾
之否曰配而不終君三出焉一既往矣後之不知
其次必此其卦曰必三取君於周其德又可以君
國三襲焉此下卦三爻變否之占君之三出而三
變陰陽易位蓋卦辭大往小來之義也
象曰包羞位不當也

論語臧文仲其竊位者與知柳下惠之賢而不與

立也此位不當之義知而蔽賢其包羞之謂矣

語邦無道富且貴焉恥也包羞所以爲位不當

九四有命无咎疇離祉

禮記惟天子受命於天士受命於君天之命君之

命一也穀梁傳人之於天也以道受命於人也以

言受命不若於道者天絕之也不若於言者人絕

之也臣子大受命有命爲受命之正否之轉機也

故曰无咎禮記予攸好德汝則錫之福時人斯其維

皇之極于其無好德汝雖錫之福其作汝用咎有

德錫福無德用咎无咎所以離祉也泰之三有戒
否之意其日有福者詩永言配命自求多福是也
否之四有轉泰之機其日離祉者詩吉甫燕喜既
多受祉是也泰之時未嘗無小人書放齊曰胤子
朱啟明驩兜曰共工方鳩僝功泰四之所謂鄰也
左傳舜舉十六族去四凶是在包荒者之用矣否
之時未嘗無君子孟子又有微子微仲王子比干
箕子膠鬲皆賢人也相與輔相之此爻之所謂疇
也書微子作賓于王家王訪于箕子孟子大公避

紂聞文王作興曰盍歸乎來又膠鬲舉於魚鹽之中是在休否者之有命矣

象曰有命无咎志行也

書伊尹戮力請命周公受命篤弼皆欲撥亂而反治者是所謂志行也

九五休否大人吉其亡其亡繫于苞桑

詩民亦勞止汔可小休惠此中國以爲民逖濟時之否休否之義書時雨時暘日休徵恒雨恒暘日咎徵咎轉爲休卽否轉爲泰也子孟子文王一怒而

安天下之民武王亦一怒而安天下之民皆休否
之大人也故吉晝天難謀命庶常常厥德保厥位
厥德靡常九有以亡休否之時其亡其亡之戒所
以兢兢也詩蕭蕭鳴行集于苞桑桑之叢生者爾
雅苞叢也稘也言其密也左傳魯秉周禮所以本
也臣聞之本必先顛而後枝葉從之苞桑其本之
謂矣左傳繫於桑本亦言其繫之固也詩徹彼桑
土綯繆牖戶今女下民或敢侮予此卽繫于苞桑
之意蓋有兢兢之心所以庇其本根之固者卽在

是也

象曰大人之吉位正當也

書將天命明威又侯天休命必有聖德而在天子之位者正當之義也詩畏天之威于時保之與夬履之象同辭保位之義也

上九傾否先否後喜

論語安無傾安則懼其傾否則欲其傾也孟子故天將降大任於是人也必先苦其心志勞其筋骨餓其體膚空乏其身所以動心忍性曾益其所不

能然後知生於憂患而死於安樂也如此則先否
後喜之義在天命實在人事矣**孟子**憂民之憂者
民亦憂其憂憂以天下先否者所謂先天下之憂
而憂也樂民之樂者民亦樂其樂樂以天下後喜
者所謂後天下之樂而樂也

象曰否終則傾何可長也

爻以傾否言者**中虛**治亂持危人事之挽回也象

曰否終則傾者**左傳**悔禍厭亂天心之轉移也**詩**

我視謀猶伊于胡底何可長者所以鑒天心而盡

人事也

三三三

離下
乾上

同人于野亨利涉大川利君子貞

孟子

口之於味也有同者焉耳之於聲也有同聽

焉目之於色也有同美焉聖人先得我心之所同

然耳理義之悅我心猶芻豢之悅我口案文同從

口即口之同徵心之同人之所以同也

禮記

天之

於人也尊而不親火之於人也尊而不親天與火

同性所以為同人**孟子**善與人同同人之義也

同今天下車同軌書同文行同倫天下大同之義

也同人連于野以爲文者**爾雅**郊外謂之牧牧外

謂之野于野之地曠遠無私天下爲公之義也**左**

傳裨謀于野則獲謀于邑則否于野之謀亦無

己私之見也**不傳**與人同欲盡濟利涉大川之義

也**論語**渚彼涇舟烝徒楫之周王于邁六師及之同

心共濟衆歸其德同人之所以利涉大川也**論語**

君子和而不同小人同而不同和之私則爲同同

之正則爲和故曰利君子貞**論語**惟文王尙克修和

我有夏亦惟有若虢叔有若閔天有若散宜生有
若泰顛有若南宮适後暨武王誕將天威威劉厥
敵若游大川予往暨汝與其濟觀於文武之世可
以知同人之利涉大川利君子貞矣

彖曰同人柔得位得中而應乎乾曰同人

左傳君所謂可而有否焉臣獻其否以成其可君
所謂否而有可焉臣獻其可以去其否若以水濟
水誰能食之若琴瑟之專壹誰能聽之同之不可
也如是柔得位者臣也得中而應乎乾能獻可否

於君者也同乎君非同而同乎理爲同是同人之正義也曰同人者卽乾卦之同聲相應同氣相求九五之文言也

同人曰同人于野亨利涉大川乾行也文明以健中正而應君子正也惟君子爲能同天下之志

禮記天無私覆于野涉川者無私之義人之所爲皆天之所爲故以乾行明之也**書**濬哲文明溫恭允塞此文明以健之德也**書**無偏無黨無反無側中正而應之理也文明卽乾象之天下文明中正

卽乾文言之龍德正中此主離之中爻言所謂應乎乾之義也**孟子**聖人先得我心之所同然耳心之所同然者謂理也義也理義之同則無私君子之正道也**禮記**五方之民達其志通其欲所謂通天下之志也**禮記**推而放諸東海而準推而放諸西海而準理之同於人者同也**孟子**王如好貨與百姓同之於王何有王如好色與百姓同之於王何有欲之同於人者亦同也皆正也**論語**子路曰願聞子之志子曰老者安之朋友信之少者懷之

此盡乎同人之義矣故曰惟君子爲能通天下之志

象曰天與火同人君子以類族辨物

爾雅祭天曰燔柴取炎上之性同於天也**左傳**炎

帝氏以火紀官故爲火師而火名以火德王者天也紀官者火同其德也天火同人不曰天在火上

不曰火在天下此可明與字之義**書**以親九族**周**

禮小宗伯掌三族之別以辨親疏此皆謂同姓之

族也**周禮**大司徒四閭爲族此謂異姓之族也**左**

傳天子建德因生以賜姓胙之土而命之氏諸侯

以字為諡因以為族官有世功則有官族此類族

之義類族者比其類而合之就人而言之也**用禮**

大司徒以土會之法辨五地之物生山林曰毛物

阜物川澤曰鱗物膏物邱陵曰羽物覈物墳衍曰

介物莢物原隰曰羸物叢物此飛潛動植有生之

物也**孟子**大物之不齊物之情也或相倍蓰或相

什伯或相千萬比而同之是亂天下也此輕重多

寡利用之物也**禮記**比物醜類此辨物之義辨物

者別其類而分之就物而言之也**國語**胥臣曰異
姓則異德異德則異類異類雖近男女相及以生
民也同姓則同德同德則同心同心則同志同志
雖遠男女不相及畏黷敬也類族之所以辨物相
反而別之之義也**孟子**親親而仁民仁民而愛物
類族之所以辨物相因而及之之義也物亦取象
於同人者民胞物與之理也**孟子**堯舜之知而不
徧物急先務也堯舜之仁不徧愛人急親賢也族
曰類物曰辨仁知之用也

初六同人于門无咎

同人之門有二義**論語**得其門者或寡矣**孟子**遊

於聖人之門者難爲言自人之來同者而言則以

入門爲義**禮記**賓于四門四門穆穆自同於人者而

言則以出門爲義此爻之義是也**禮記**儒有合志

同方營道同術此同人于門之義也無所私主故

无咎

象曰出門同人又誰咎也

論語出門如見大賓同人之所以无咎此其義也

論語孝哉閔子騫人不閒於其父母昆弟之言出門而同則爲人心之大同人之無閒又誰咎之義也**論語**出則弟又出則事公卿皆出門同人也

九二同人于宗吝

禮記別子爲祖繼別爲宗繼禰者爲小宗又同姓

從宗合族屬宗本同人之宜而恐其或係於私故以爲吝**禮記**大道之行也天下爲公故人不獨親其親不獨子其子是謂大同今大道旣隱天下爲家各親其親各子其子是謂小康于宗者可以明

公私之辨矣

象曰同人于宗吝道也

國語黃帝之子二十五人其同姓者二人而已唯青陽與夷鼓皆爲己姓青陽方雷氏之甥也夷鼓彤魚氏之甥也其同生而異姓四姓之子別爲十二姓凡黃帝之子二十五宗其得姓者十四人唯青陽與蒼林氏同於黃帝故皆爲姬姓同德之難也如是同人于宗其義狹而不廣故曰吝道

論語

如有周公之才之美使驕且吝其餘不足觀也已

周公之不牽私黨可以知吝道之害也

九三伏戎于莽升其高陵三歲不興

左傳匪以玉帛相見而以興戎同人所以有伏戎

之象也 **左傳**暴骨如莽莽者隱密之地所以伏戎

也 **左傳**鄭伯使曼伯子元潛軍軍其後此伏戎而

侵害之義也曰伏戎于莽者欲人之不見 **論語**匿

怨而友其人是其義也 **左傳**齊侯登巫山以望晉

軍此升高以觀望之義也曰升其高陵者恐己之

不勝 **左傳**無禮而好陵人是其義也 **論語**一日不見

如三歲兮三歲言時之久不與者 **不備** 不敢逞志

之謂也剛而不中不能同人小人之情狀如是

象曰伏戎于莽敵剛也三歲不與安行也

爾雅 敵當也與上相應以剛敵剛 **左傳** 並后匹嫡

大都耦國亂之本也凡勢之相敵未有不起戎心

者所以難同也 **詩** 王子興師修我甲兵與子偕行

不與故曰安行 **詩** 爾之安行亦不遑舍爾之亟行

遑脂爾車觀蘇公暴公同人相傷其安行之不足

信亦可以明其義矣

九四乘其墉弗克攻吉

臨臨衝閑閑崇墉言言臨衝蕩蕩崇墉仡仡攻人者必乘其墉是其象也**論語**攻其惡無攻人之惡弗克者有自反之道是以吉也

象曰乘其墉義弗克也其吉則困而反則也

左傳齊侯曰以此攻城何城不克屈完對曰君若以德綏諸侯誰敢不服不曰力弗克而曰義弗克此之謂也**公羊傳**晉郤缺帥師納接菑于邾婁邾婁人曰獲且也長郤缺曰非吾力不能納也義實

不爾克也引師而去之故君子大其弗克納也義
之弗克是反其則也**孟子**愛人不親反其仁治人

不治反其智禮人不答反其敬困而反則之謂也

公羊傳楚莊王圍宋司馬子反乘堙而闚宋城宋

華元亦乘堙而出見之子反曰子之國何如華元

曰憊矣易子而食之析骸而炊之子反曰吾軍亦

有七日之糧爾莊王怒曰子曷爲告之司馬子反

曰以區區之宋猶有不欺人之臣可以楚而無乎

是以告之也引師而去之此正乘墉弗克困而反

則之義子反華元以信相與尤有合於同人之旨
九五同人先號咷而後笑大師克相遇

詩不見復關泣涕漣漣既見復關載笑載言先難

後合是先號後笑之義也**左傳**用大師焉曰滅大

師大衆言用力之難且重也**禮記**我戰則克義足

以勝之也卦以同人爲義而言大師者地水爲師

同人之伏象也三之伏戎四之乘墉必克之而後

與二相合也**國語**昔少典取於有蟠氏生黃帝炎

帝黃帝以姬水成炎帝以姜水成成而異德故黃

帝爲姬炎帝爲姜二帝用師以相濟也異德之故也凡天下之同必有異者以爲之梗書舜流共工於幽州放驩兜於崇山竄三苗於三危殛鯀於羽山四罪而天下咸服詩旣破我斧又缺我斨周公東征四國是皇是皆大師之克而後大同乎天下之人者此義理之同終不得而間之者也

象曰同人之先以中直也大師相遇言相克也

孟子不直則道不見中直者以直相與其應在後笑之時而實自矢於號咷之先所以終能大同也

中庸所求乎朋友先施之未能也朋友之信卽所謂同人之先也**論語**一日克己復禮天下歸仁焉己之私必克而後人同之**大學**唯仁人放流之此謂唯仁人爲能愛人能惡人**中庸**去讒遠色賤貨而貴德所以勸賢也人之私亦必克而後人同之相遇之由於相克此其義也

上九同人于郊无悔

詩十畝之間兮行與子旋兮十畝之外兮行與子逝兮郊外場圃之地**論語**長沮桀溺耦而耕此皆

同人于郊者也中庸遊世不見知而不悔處無位之地此无悔之義也

象曰同人于郊志未得也

于野于郊不同詩子子干旄在浚之郊野則無遠

之弗屆郊則有地之可名家語楚昭王出遊亡鳥

號之弓左右請求之王曰楚人亡弓楚人得之又

何求焉孔子聞之曰惜乎其志不大也不曰人亡

弓人得之何必楚也志之未得未能大同乎天下

也論語子曰鳥獸不可與同羣吾非斯人之徒與

而誰與同人于郊不能遍天下之志矣聖人之志所以異於隱逸之士與

三三

乾下
離上

大有元亨

爾雅 𡗗大也 𡗗有也大與有同義可以釋本

卦之名無所不有之謂大 **禮記** 大明生於東月生

於西案文有從月從日即右字象月之生明於西

而爲有也日在天上是以爲大有 **穀梁傳** 五穀大

熟爲大有年大有之稱是其象也 **詩** 九有有截 **書**

以有九有之師所有之大是大有之義也。[大學]有德此有人有人此有土有土此有財有財此有用其德足以有之故曰元亨此以九居五而應之者五陰臣庶之象也大有以六居五而應之者五陽賢才之象也。[論語]舜有臣五人而天下治武王曰予有亂臣十人有莫大於此矣

彖曰大有柔得尊位大中而上下應之曰大有

[中庸]寬裕溫柔足以有容也仁為善之長柔得尊位之義也。[中庸]德為聖人尊為天子富有四海之

內宗廟饗之子孫保之有大中之德而上下應之
此其義也曰大有者即乾卦文言聖人作而萬物
覩也書光被四表格于上下所謂上下應之者也
其德剛健而文明應乎天而時行是以元亨

書帝德廣運剛健以行之乾之運也書欽明文思
濬哲文明文明以察之離之照也詩明明在下赫
赫在上天人相與之際其理昭著應天而時行也

象曰火在天上大有君子以遏惡揚善順天休命

書日永星火以正仲夏火在天上之象此其尤著

者也。詩：照臨下土。孟子：容光必照焉，無所不照，謂之大有。書：光天之下，萬邦黎獻，共惟帝臣，惟帝時舉，是火在天上，大有之義也。爾雅：遏，止也。書：遏絕苗民，無世在下，絕惡之極也。書：明明揚側陋，舉善於衆也。詩：如火烈烈，則莫我敢遏。又：燎之方揚，寧或威之，遏與揚皆象火之義。中庸：隱惡而揚善，此皆明照之用也。書：天命有德，五服五章哉。天討有罪，五刑五用哉。遏惡揚善，皆天命也。書：天惟時求民主，乃大降顯休命于成湯。又：萬億年敬天之休。

天命有善而無惡所以爲順天休命也

初九无交害匪咎艱則无咎

書位不期驕祿不期侈有之大者鮮不爲害无交
害者以其在初也曰匪咎者**左傳**匹夫無罪懷璧
其罪吾焉用此其以賈害也語意正相似言富有
本非其咎而貪則爲害也**書**非知之艱行之惟艱
曰艱則无咎乃所以戒之也

象曰大有初九无交害也

論語始有曰苟合矣少有曰苟完矣富有曰苟美

矣富有之初本於始有知其有而自足卽大有初九之義居室之善可通於天下也

九二大車以載有攸往无咎

周禮大車平地旣節軒輕之任大車言任載之車

也**周禮**凡察車之道必自載於地者始也以載者

言其任之責也**周禮**一器而工聚焉者車爲多大

車之兼衆材大臣之集衆思廣衆益皆以載之義

也**論語**任重而道遠大車攸往之義也**孟子**伊尹

聖之任者也其自任以天下之重如此大車以載

是足當之

象曰大車以載積中不敗也

周禮 竝其輻廣以爲之弱則雖有重任較不折積
中不敗之義也

九三公用亨于天子小人弗克

公羊傳 天子三公稱公王者之後稱公公之爲稱

以三四皆近君之位也 **左傳** 王饗有體薦燕有折

俎公當饗卿當燕是以用亨曰公也 **左傳** 穆叔如

晉金奏肆夏之三不拜曰三夏天子所以享元侯

也此可以明小人弗克之義位之不當則辭况德
之弗堪乎**左傳**晉侯勤王使卜偃卜之曰吉遇黃
帝戰于阪泉之兆公曰吾不堪也筮之遇大有之
睽曰公用亨于天子戰克而王饗吉孰大焉且是
卦也天爲澤以當日天子降心以逆公不亦可乎
大有去睽而復亦其所也此卽明用亨之義小人
弗克與師上小人勿用之義同**書**汝其敬識百辟
享亦識其有不享不享卽小人之弗克者也

象曰公用亨于天子小人害也

書惟辟作福惟辟作威惟辟玉食臣無有作福作威玉食臣之有作福作威玉食其害于而家凶于而國臣之上僭小人害之義也論語邦君爲兩君之好有反坫管氏亦有反坫此器小易盈之害不能當大有之任者也

九四匪其彭无咎

詩行人彭彭反駟駟彭彭皆以爲盛多之貌以剛處柔有不極其盛之象故曰匪其彭无咎書居寵思危罔不惟畏此匪其彭之義也書臣罔以寵利

居成功戒盛滿也**左傳**富而能臣必免於難所以

无咎者也

象曰匪其彭无咎明辨哲也

中庸辨之弗明弗措也辨理必明所以處己**詩**明

星晰晰哲則辨之至明者矣**左傳**寵而不驕驕而

能降明於盈虛之理則思其危**左傳**敢隕越於下

以貽天子羞辨於君臣之分則盡其敬无咎之義

在是

六五厥孚交如威如吉

詩儀型文王萬邦作孚人君以信接下人臣以信
事上所謂厥孚交如者也左傳有威而可畏謂之
威是謂威如之吉大學赫兮喧兮者威儀也如者
形容其德容之盛也書德威惟畏德明惟明此爻
爲一卦之主火在天上是其義也左傳成季之將
生也桓公使卜楚邱之父卜之曰男也其名曰友
在公之右閒於兩社爲公室輔又筮之遇大有之
乾曰同復於父敬如君所乾爲君爲父五又爲君
父之位其曰爲公室輔亦可見厥孚交如之義

象曰厥孚交如信以發志也威如之吉易而无備也

天學與國人交止於信此言交之以信也**論語**上

好信則民莫敢不用情用情卽發志之謂也**論語**

君子正其衣冠尊其瞻視儼然人望而畏之斯不

亦威而不猛乎威如之所以吉也**禮記**外貌斯須

不莊不敬而慢易之心入之矣言不可易也**論語**

君子所貴乎道者三動容貌斯遠暴慢矣正顏色

斯近信矣出辭氣斯遠鄙倍矣易而无備此其戒

也**左傳**臧文仲曰國無小不可易也無備雖衆不

可恃也易與無備之解如此左傳去備薄威是備
所以爲威無備不可以言威也公羊傳靈公使勇
士某者往殺趙盾勇士曰吾入子之大門則無人
焉入子之闈則無人焉上子之堂則無人焉是子
之易也言簡易無備而人自畏之此又一解然不
忘恭敬則亦非故示懈弛也

上九自天祐之吉无不利

詩假樂君子顯顯令德宜民宜人受祿于天保佑
命之自天申之六五尙賢獲天之祐故於上九著

宮括得人爲受命之本故曰大有上吉尙賢之義也
中庸故大德必得其位必得其祿必得其名必
得其壽自天之祐若固有之是以爲大有也

三三
坤上 艮下

謙亨君子有終

案文謙從言從兼歎之省也凡不滿者皆曰歎穀

梁傳一穀不升謂之謙見於言者尤其著也**中庸**

郊社之禮所以祀上帝也地卑而配天則尊**禮記**

五嶽視三公山高而屬地則卑山無卑於地之象

有卑於地之理卽其象也所以爲謙論語巍巍乎
舜禹之有天下也而不與焉何有於山之高而居
之乎書匹夫匹婦一能勝予何有於地之卑而忽
之乎謙之所以亨也論語有一言而可以終身行
之者其怨乎謙亦可以終身行之者也故曰君子
有終

彖曰謙亨天道下濟而光明地道卑而上行

中庸高也明也天之明本以其高曰下濟而光明
者詩無曰高高在上陟降厥士日監在茲天體本

高日月運行所以下濟謙之義也。詩有扁斯石履之卑分地體本卑順承乎天所以上行亦謙之義也。禮記地氣上齊天氣下降下濟上行之義與地天之泰澤山之咸同而泰則相交咸則相感謙則言其自處也。

天道虧盈而益謙地道變盈而流謙鬼神害盈而福謙人道惡盈而好謙謙尊而光卑而不可踰君子之終也。

詩彼月而微此日而微微之爲言虧也日中則昃

月盈則缺天道之虧盈也禮記月者三日則成魄

三月則成時是以禮有三讓讓象月天道之益謙

也詩百川沸騰山冢崩高岸爲谷深谷爲陵滿

則必溢高不可恃地道之變盈也孟子人無有不

善水無有不下又流水之爲物也不盈科不行其

性善下其義不盈地道之流謙也禮記孝子之祭

也退立而不受命教也如是而祭失之矣賢者之

祭也必受其福福者備也百順之名也此鬼神害

盈而福謙也左傳神福仁而禍盈卽此義矣書殖

有禮覆昏暴德曰新萬邦惟懷志自滿九族乃離

此人道惡盈而好謙也孟子湯之於伊尹學焉而

後臣之故不勞而王桓公之於管仲學焉而後臣

之故不勞而霸尊謂尊人此所謂謙尊而光也禮

記君子不自大其事不自尙其功以求處情過行

弗率以求處厚彰人之善而美人之功以求下賢

是故君子雖自卑而民敬尊之卑謂自卑此所謂

卑而不可踰也孟子訕訕之聲音顏色距人於千

里之外此尊而不光者左傳叔孫昭子聘於宋桐

門右師見之語卑宋大夫而賤司城氏昭子告人曰右師卑大夫而賤其宗是賤其身也能有禮乎

此卑而可踰者皆昧於謙之道也論語曾皙曰夫

子何哂由也子曰其言不讓是故哂之惟赤則非

邦也與子曰赤也爲之小孰能爲之大觀聖人之

言謙尊而光卑而不可踰之義見矣孟子好名之

人能讓千乘之國苟非其人簞食豆羹見於色謙

之爲德非出於誠則不能久曰君子之終可以明

謙之義矣

象曰地中有山謙君子以裒多益寡稱物平施

中庸今夫地載華嶽而不重今夫山草木生之禽

獸居之寶藏興焉山之所有皆地之所有地既忘

其有山亦不自有其有此地中有山之象所以爲

謙也**詩**謂山蓋卑爲岡爲陵此訛言也虛象而以

爲實境君子自修之道矣**詩**原隰裒矣裒者山之

象也**爾雅**裒多也裒其多所以益其寡也**孟子**分

人以財謂之惠教人以善謂之忠皆裒多益寡之

義也**論語**君子周急不繼富此稱物平施之義也

孟子樂歲粒米狼戾多取之而不爲虐則寡取之凶年糞其田而不足則必取盈焉又稱貸而益之此與稱物平施相反矣**孟子**權然後知輕重度然後知長短物皆然心爲甚王請度之稱物之謂也**論語**己所不欲勿施於人平施之謂也**禮記**禮時爲大順次之體次之宜次之稱次之先王之制禮也不可多也不可寡也唯其稱也增卑損高以趨於平君子有取於此此謙爲制禮之本也

初六謙謙君子用涉大川吉

謙子夏易傳作慤漢書藝文志亦曰易之慤慤

語慤慤之德不足就也不可以矜而祇取憂也小

小之義蓋謙而又謙之謂也卦德爲謙初又在下

故曰謙謙**論語**有若無實若虛謙之在己者也**禮**

記賈人而賤己先人而後己謙之與人者也皆謙

之至也**家語**耕者讓畔行者讓路謙之用也處常

爲善涉險尤宜故吉**左傳**晉師鼓於軍中先濟者

有賞中軍下軍爭舟舟中之指可掬也爭而濟者

凶則謙而涉者吉矣

象曰謙謙君子卑以自牧也

禮記禮者自卑而尊人**左傳**卑讓禮之宗也故曰

卑以自牧**詩**自牧歸荑此說本之程傳荑為柔順

之物亦可見謙卑之義**左傳**馬曰圉牛曰牧養馬

牛之人也自養謂之自牧者謙卑孫順亦有取於

馴伏之義也**禮記**卑毋調自牧之義非調之謂矣

六二鳴謙貞吉

大學人之彥聖其心好之不啻若自其口出謙之

不能自己者誠不可揜象亦如此**詩**嚶其鳴矣求

其友聲鳴而求友卽鳴謙之義也貞吉者禮記惟
禮不可以爲僞正則吉也

象曰鳴謙貞吉中心得也

孟子恭儉豈可以聲音笑貌爲哉出於中心之誠
也論語慮以下人所謂中心得也

九三勞謙君子有終吉

書成允成功惟女賢不自滿假惟女賢有功勞而
能謙也書推賢讓能謙者君子之本志勞而不忘
其謙是以有終之吉與卦辭同書自周有終相亦

惟終無成代終此卽臣道之謙坤之六三同義

象曰勞謙君子萬民服也

〔周禮〕民功曰勞功之及於民者也〔禮記〕有庇民之大德有事君之小心萬民之所以服也〔孟子〕以德服人然後能服天下萬民之服不僅服其勞之功而尤服其謙之德也

六四无不利撝謙

〔禮記〕飲玉爵者弗揮焉與揮同〔公羊傳〕莊王親自手旌左右撝軍撝之爲義從手意之所使也〔禮記〕

諸侯有善歸之天子卿大夫有善薦於諸侯爲謙者讓善之意也四居上體上承五位左傳管仲讓不忘其上是以謙奉上也左傳范宣子讓其下皆讓是以謙奉下也此无不利撝謙之謂也禮記使耳目口鼻心知百體皆由順正以行其義撝謙之義如此蓋言謙之爲德无不著見於施爲動作之間也

象曰无不利撝謙不違則也

詩令儀令色柔嘉維則此撝謙之不違則也禮記

天子搢珽方正於天下也諸侯荼前詘後直讓於天子也大夫前詘後詘無所不讓也卽一器而皆見讓之義搢謙之意明矣禮記讓所以示順也故曰不違則禮記善則稱人過則稱己則民不爭善則稱人過則稱己則民作讓善則稱君過則稱己則民作忠善則稱親過則稱己則民作孝搢謙之不違則於此可見

六五不富以其鄰利用侵伐无不利

孟子齊宣王問曰交鄰國有道乎孟子曰有惟仁

者爲能以大事小是故湯事葛文王事昆夷以大
事小此不富以其鄰之義也孟子湯居亳與葛爲
鄰葛伯放而不祀湯使遺之牛羊亳衆往爲之耕
有童子以黍肉餉殺而奪之爲其殺是童子而征
之皆曰非富天下也爲匹夫匹婦復讎也利用侵
伐卽不富以其鄰之實於此可見也孟子東面而
征西夷怨南面而征北狄怨曰奚爲後我故又言
无不利詩肆不殄厥愠亦不隕厥問柞械拔矣行
道兌矣昆夷駮矣維其喙矣文王之義與湯同之

湯文之事葛事昆夷不富以其鄰者謙也湯文之

征葛伐昆夷利用侵伐也惟謙而後能服人故象

以征不服明之禮記觴酒豆肉讓而受惡民猶犯

齒衽席之上讓而坐下民猶犯貴朝廷之位讓而

就賤民猶犯君利用侵伐仍以禮治之之義也左

傳凡師有鐘鼓曰伐無曰侵侵隱而伐顯也公羊

傳狃者曰侵精者曰伐侵略而伐深也穀梁雋苞

人民毆牛馬曰侵斬樹木壞宮室曰伐侵輕而伐

重也書有苗弗率禹徂征苗民逆命益贊于禹曰

惟德動天無違弗屆滿招損謙受益時乃天道帝
乃誕敷文德舞干羽于兩階七旬有苗格以謙爲
用師之本始於唐虞此文之義見矣

象曰利用侵伐征不服也

孟子征者上伐下也敵國不相征也此征之義也

國語甸服者祭侯服者祀賓服者享要服者貢荒
服者王序成而有不至於是刑罰之辟有攻伐
之兵有征討之備所謂征不服也**論語**故遠人不
服則修文德以來之文德卽謙德也

上六鳴謙利用行師征邑國

詩予羽譙譙予尾脩脩予維音嘒嘒懼而自警亦
鳴謙之義也**詩**公孫碩膚德音不瑕是公之謙而
共著也**詩**既破我斧又缺我斨周公東征四國是
皇周公之行師征邑可以知其鳴謙之誠矣五曰
侵伐上曰邑國義有廣狹君臣之分也**左傳**楚莊
王圍鄭鄭伯肉袒牽羊以逆曰其君能下人必能
信用其民矣征邑國者言能自用其衆也

象曰鳴謙志未得也可用行師征邑國也

書周公曰我之弗辟無以告我先王志未得之義
如此六二之鳴謙曰中心得者以其在中而虛受
也上六之鳴謙曰志未得者以其在上而思危也

左傳軍志曰見可而進行師之利以其可也謙至

五上二爻而曰侵伐行師**論語**君子無所爭必也
射乎揖讓而升下而飲其爭也君子蓋讓之義必

於是而後盡也

三三三 坤下
震上

豫利建侯行師

易者象也案文豫從象從予豫卽象之大者其性
至馴所以取象於順動也**禮記**人生而靜天之性

也感於物而動性之欲也坤在下靜也震在上動

也由靜而動所以爲豫**詩**逸豫無期和樂之義**書**

無時豫怠般樂之義**爾雅**豫安也樂也卦辭則專

取其善者言之也**書**明王奉若天道建邦設都樹

后王君公承以大夫師長不惟逸豫惟以亂民**左**

傳周之封建其懷柔天下也豫之利於建侯此其

義也**左傳**師克在和不在衆豫之利於行師此其

善也。禮記：夔始制樂以賞諸侯。周禮：太師吹笙。

以聽軍聲。此建侯行師之所以皆取諸豫也。

秦伯納公子重耳於楚。公子筮之曰：尚有晉國。

貞屯悔豫皆八也。司空季子曰：吉。我命曰：尚有益。

國告我曰：利。建侯得國之務也。震車也。坎水也。坤

土也。屯厚也。豫樂也。車班內外順以訓之。泉貨以

資之。土厚而樂其實。不有晉國何以當之。坤母也。

震長男也。母老子彊。故曰：豫其繇曰：利。建侯行師。

居樂出威之謂也。屯與豫皆言建侯。坤為土。得國。

之義爲衆行師之義也

象曰豫剛應而志行順以動豫

詩藹藹王多吉士惟君子使媚于天子藹藹王多

吉人惟君子命媚于庶人一剛在四而上下應之

其志得行所謂衆賢和於本朝豫之象也 **禮記**正

聲感人而順氣應之順氣成象而和樂興焉順以

動者所謂履中蹈和豫之德也 **中庸**凡事豫則立

不豫則廢言前定則不跲事前定則不困行前定

則不疚道前定則不窮此卽剛應志行而後順以

動者豫之理也

豫順以動故天地如之而况建侯行師乎

禮記樂則天天則神順動可以格天地故曰天地

如之**中庸**致中和天地位焉此如之之義也**左傳**

季札觀樂見舞韶箭者曰德至矣哉大矣如天之

無不疇也如地之無不載也所謂豫順以動天地

如之者也**孟子**臂腴底豫而天下化父子之順也

孟子一遊一豫爲諸侯度君臣之順也**孟子**如欲

平治天下當今之世舍我其誰也吾何爲不豫哉

天人之順也言謙之義通乎天地則建侯行師不
難也論語子路曰衛君待子而爲政子將奚先子
曰必也正名乎名不正則言不順言不順則事不
成是建侯之宜順以動者也孟子寡助之至親戚
畔之多助之至天下順之以天下之所順攻親戚
之所畔有不戰戰必勝矣是行師之宜順以動者
也

天地以順動故日月不過而四時不忒聖人以順動
則刑罰清而民服豫之時義大矣哉

禮記天地順而四時當是天地以順動也**詩**日月
告凶不用其行用其行則不過也**禮記**宿離不貸
不忒者不僭差也**中庸**四時之錯行日月之代明
皆天地順動之故也**論語**禮樂不興則刑罰不中
刑罰不中則民無所措手足此聖人順動之故也
書惟動丕應後志是聖人以順動也**孟子**省刑罰
省所以清之也**論語**舉直錯諸枉則民服是其義
也**禮記**父子篤兄弟睦夫婦和家之肥也大臣法
小臣廉官職相序君臣相正國之肥也天子以德

爲車以樂爲御諸侯以禮相與大夫以法相序士以信相考百姓以睦相守天下之肥也是謂大順
豫之時義是以大也

象曰雷出地奮豫先王以作樂崇德殷薦之上帝以配祖考

禮記仲春之月雷乃發聲雷出地奮之象也**左傳**藏冰以時則雷出不震所以爲豫**禮記**樂由陽來雷之始奮陽之動也**禮記**發以聲音而文以琴瑟從以簫管奮至德之光動四氣之和先王象之以

作樂者也**周禮**雷鼓雷鼗雷之象樂亦取其聲也

禮記大章章之也咸池備矣韶繼也夏大也其名

皆所以崇德也**書**王肇稱殷禮殷薦之爲盛禮也

周禮大旅上帝上帝之爲祭天也**周禮**大司樂以

圓鍾爲宮孤竹之管雲和之琴瑟雲門之舞於地

卜之圜丘奏之此祭上帝之樂也**禮記**萬物本乎

天人本乎祖此所以配上帝也此明配之爲義也

左傳少康祀夏配天不失舊物此夏祖考配天之

祭也**書**在昔成湯在大甲在大戊在祖乙在武丁

殷禮陟配天多歷年所此殷祖考配天之祭也

經郊祀后稷以配天宗祀文王於明堂以配上帝

此周祖考配天之祭也**孟子**禮之實節文斯二者

是也謙之稱物平施也樂之實樂斯二者是也豫

之作樂崇德也**孟子**見其禮而知其政聞其樂而

知其德於謙豫二卦可以知禮樂之本矣

初六鳴豫凶

鳴如**左傳**平陰之役先二子鳴之鳴豫至於鳴志

得意滿者也**禮記**志不可滿樂不可極鳴豫之所

以凶也

象曰初六鳴豫志窮凶也

在初而以爲志窮者**左傳**先爲之極是其義也**論**

語不愆不求何用不臧子路終身誦之子曰是道也何足以臧誦之亦鳴之意吉德尚不可以自鳴况凶德乎身之未終而知其志之先窮矣

六二介于石不終日貞吉

詩我心匪石不可轉也石尙可轉自守不移者所以曰介于石也**孟子**柳下惠聖之和者也**又**不以

三公易其介和而能介豫之義是以取之**孟子**孔
子去齊接淅而行**又**去魯不說冕而行不終日之
義也正而能固所以爲吉

象曰不終日貞吉以中正也

孟子可以速而速得乎中而行其正也**中庸**和而
不流強哉矯中立而不倚強哉矯中正之義也**禮**
記君子樂得其道小人樂得其欲二與初之分在
是矣

六三盱豫悔遲有悔

禮記諸侯綏視大夫衡視士視五步盱爲上視非
視之正**禮記**毋淫視盱豫蓋容悅之流也**詩**壹者
之來云何其盱盱亦望視之意猶豫望伺皆陰邪
也是以曰有悔**詩**無然泄泄猶可爲戒之辭怠緩
悅從則遲而有悔矣**書**鬱陶乎予心顏厚有忸怩
弗慎厥德雖悔可追警悔者之遲也
象曰盱豫有悔位不當也

中庸在下位不援上盱豫卽援上者也故曰位不
當**爾雅**遽條口柔也戚施面柔也夸毗體柔也陰

柔處位是其所以不當之義

九四由豫大有得勿疑朋盍簪

論語 一日克己復禮天下歸仁焉為仁由己而由

人乎哉天下之歸由於己故曰由豫 **論語** 有朋自

遠方來不亦樂乎衆陰來從乎一陽是由豫大有

得之義也 **書** 任賢勿貳去邪勿疑勿疑即勿貳也

爾雅 盍合也朋友以人合者 **儀禮** 簪裳于衣注連

也是有連聚之義也 **穀梁傳** 同者有同也同尊周

也衣裳之會十有一未嘗有歃血之盟也信厚也

兵車之會四未嘗有大戰也愛民也所謂勿疑朋
豈善者是建侯行師皆可以大有得也

象曰由豫大有得志大行也

孟子夏諺曰吾王不遊吾何以休吾王不豫吾何
以助此志大行之義也

六五貞疾恆不死

左傳宴安酖毒不可懷也疾之生於豫也**書**若藥
弗瞑眩厥疾弗瘳疾之所以恆也**書**曰咎徵曰豫
恆煥若恆豫之爲疾義如是也**孟子**今之欲王者

猶七年之病求三年之艾也苟爲不畜終身不得
恆疾之所以不死也**孟子**齊宣王曰寡人有疾寡
人好貨寡人有疾寡人好色**孟子**曰與百姓同之
於王何有是疾之生於豫而可勉以貞也**孟子**人
之有德慧術知者恆存乎疾疾此貞疾恆不死之
義也猶能貞者**孟子**入則無法家拂士出則無敵
國外患者國恆亡然後知生於憂患而死於安樂
也不死之義益明矣

象曰六五貞疾乘剛也恆不死中未亡也

經昔者天子有諍臣七人雖無道不失其天下諸侯有諍臣五人雖無道不失其國諍臣猶足以正之乘剛之義所以爲貞 **左傳**哀樂而樂哀皆喪心也心之精真是謂魂魄魂魄去之何以能久心喪則不能久恆不死故曰中未亡

上六冥豫成有渝无咎

謝維塵冥冥昏晦之象也 **注**內作色荒外作禽荒

甘酒嗜音峻宇雕牆皆其冥然而罔覺者也 **左傳**

鄭人來渝平更成也此所謂成有渝者在盟則爲

墮成在豫則爲悔過成有渝者豫之終而望其一
變也**惟**狂克念作聖能變者也**不**能自克
以及於難足以鑿矣**王**未克變王徂桐宮居憂
克終允德曰欲敗度縱敗禮旣往背師保之訓弗
克于厥初尚賴匡救之德圖維厥終伊尹拜手稽
首曰王懋乃德視乃烈祖無時豫怠成有渝而无
咎大甲是也

象曰冥豫在上何可長也

無已大康職思其憂好樂無荒良士休休初之

志窮者至在上而極矣故曰何可長
書大康尸位以逸豫滅厥德
咎于有洛之表十旬弗反有窮后羿因民弗忍距于河
冥豫何可長之謂矣
論語不仁者不可以長
處樂是何可長之義也

三三
兌震
上 下

隨元亨利貞无咎

禮記仲秋之月雷乃收聲
雷在澤中象八月之藏

於澤收聲之時所以取隨時之義
案文隨從阜從儿從左從月
書隨山刊木隨之爲義順乎道之自

然故文從阜 **禮記** 父之齒隨行從乎道之當然故

文從辵古者尚右左則先人後己之義月象人體

足動而趾隨皆其義也 **書** 舍己從人此以隨人為

義者也 **書** 罔咈百姓以從己之欲此以人之隨為

義者也皆隨之所以大通也故曰元亨 **詩** 無縱詭

隨故又必利於正乃无咎也

彖曰隨剛來而下柔動而說隨

孟子 用上敬下謂之尊賢此剛來下柔之義也 **中**

庸行 而民莫不說動而說之義也剛來下柔而柔

隨之**孟子**欲有謀焉則就之學焉而後臣之是主
先而臣隨者也震男動乎內而兌女說乎外**詩**寤
寐求之琴瑟友之是夫倡而婦隨者也皆可以明
隨之義焉故曰隨

大亨貞无咎而天下隨時

書惟天聰明惟聖時憲惟臣欽若惟民從又天下
之隨不曰隨君而曰隨時君隨乎天之時天下隨
乎君之時是爲大亨貞而无咎者也**禮記**五帝不
相襲禮三王不相沿樂此聖人在上而天下隨時

之義也

隨時之義大矣哉

大戴禮 隨天之時時本乎天也 **中庸** 君子而時中

從宜適變皆隨時以處中也 **禮記** 昔者聖帝明王

諸侯辨貴賤長幼遠近男女外內莫敢相踰越者

皆由此塗出也故曰隨時之義大 **論語** 色斯舉矣

翔而後集曰山梁雌雉時哉時哉鳥本飛也而集

曰時雷本動也而息曰時此隨時之義故於雷澤

著之也 **左傳** 穆姜薨於東宮始往而筮之遇艮之

八史曰是謂民之隨其出也君必速出姜曰亡是於周易曰隨元亨利貞无咎元體之長也亨嘉之會也利義之和也貞事之幹也體仁足以長人嘉德足以合禮利物足以和義貞固足以幹事我婦人而與於難固在下位而有不仁不可謂元不靖國家不可謂亨作而害身不可謂利弃位而姣不可謂貞有四德者隨而无咎我皆無之豈隨也哉我則取惡能无咎乎隨之以正爲義於此可見象曰澤中有雷隨君子以嚮晦入宴息

畫雷夏既澤因其神名之曰雷夏**山海經**澤中有

雷神龍身而人頰鼓其腹則雷此澤中有雷之象

雷在澤中伏藏而未震動之時君子之嚮晦人宴

息亦於此象之也**詩**夜如何其夜嚮晨夜之嚮辰

爲曉晝之嚮晦則爲息也**禮記**宴宴居息也**詩**或

燕燕居息安身之謂也**國語**明而動晦而休無日

以怠是隨時之義也**禮記**夫晝居於內問其疾可

也夜居於外弔之可也是故君子非有大故不宿

於外非致齋也非疾也不晝夜居於內此可以明

嚮晦宴息之義

初九官有滄貞吉出門交有功无咎

孟子耳目之官不思而蔽於物物交物則引之心

之官則思思則得之心之有主與官之有職同初

九陽爻而下於陰是官有滄者也**大學**心有所忿

懣則不得其正有所恐懼則不得其正有所好樂

則不得其正有所憂患則不得其正有滄者必從

乎正是以曰貞吉**論語**出則弟**又**出則事公卿出

門之交不私其隨是以有功而无咎

象曰官有渝從正吉也出門交有功不失也

孟子從其大體爲大人從其小體爲小人故曰

正吉**論語**因不失其親亦可宗也不失之義也

六二係小子失丈夫

爾雅係繼也猶聯屬之意**書**遠者德比頑童係小

子而失丈夫也**孟子**樂正子從於子敖之齊見孟

子孟子曰子亦來見我乎子之從於子敖來徒舖

嘍也此卽係小子失丈夫之謂蓋隨人者不可不

慎也

象曰係小子弗兼與也

禮記從長者而上邱陵則必鄉長者所視從於先生不越路而與人言兼與則所隨者不專故戒之也况非其所與者乎

六三係丈夫失小子隨有求得利居貞

禮記五年以長則肩隨之丈夫之宜係也**詩**老夫

灌灌小子躑躅小子之宜失也**孟子**徐行後長者

謂之弟疾行先長者謂之不弟隨與不隨之得失可見矣**論語**可與言而不與之言失人不可與言

而與之言失言知者不失人亦不失言不失人則
丈夫係矣不失言則小子失矣此亦見隨之正也
孟子求則得之舍則失之是求有益於得也求在
我者也求之有道得之有命是求無益於得也求
在外者也隨有求得以明隨之爲義求在我而非
求在外也**穀梁傳**求者得不得未可知之辭也求
之所以利於正也**中庸**正己而不求於人利居貞
之謂也

象曰係丈夫志舍下也

論語 毋友不如己者志舍下之義也 **孟子** 狂者進

取二弗兼與無所兼以明其專三志舍下有所舍

以尊所取足以盡隨之義矣 **孟子** 于夏子游子張

皆有聖人之一體冉牛閔子顏淵則具體而微敢

問所安孟子曰姑舍是乃所願則學孔子也志乎

望者賢猶舍之志乎正者邪更不可以不舍矣

九四隨有獲貞凶有孚在道以明何咎

禮記 下之事上也雖有庇民之大德不敢有君民

之心是故君子恭儉以求役仁信讓以求役禮不

自尙其事不自尊其身儉於位而寡於欲讓於賢
率己而尊人小心而畏義求以事君得之自是不
得自是以聽天命其舜禹文王周公之謂與有君
民之大德有事君之小心四與五同德是臣與君
一德而能得衆者隨有獲之義所謂君民之大德
也恭儉信讓事君聽天卽有孚在道以明之義所
謂事君之小心也貞亦曰凶人臣自警之義

在傳

舅犯曰臣負羈絏從君臣之罪甚多矣臣猶知之
而况君乎以明何咎此亦其義

家曰隨有獲其義凶也有孚在道明功也

疏子未有義而後其君者也公爾忘私則正後義

先利則凶故以其義明之 **注**陳氏以家量貸而

以公量收之其愛之如父母而歸之如流水欲無

獲民將焉辟之隨有獲而非其道者此卽義之凶

也 **詩**既明且哲以保其身明之爲功如是

九五孚于嘉吉

論語擇其善者而從之隨以隨善爲吉 **詩**我有嘉

賓中心既之所謂孚于嘉也 **詩**嘉言罔攸伏是聽

言之孚于嘉也。書：予懋乃德，嘉乃丕績，是用人之
孚于嘉也，故皆吉。

象曰：孚于嘉，吉位正中也。

左傳：有嘉德而無違心，正中者其德而茲以位言

者。**孟子**：古之賢王好善而忘勢，正所以明孚于嘉

之義也。**書**：爾有嘉謀嘉猷，則入告爾后，于內爾乃

順之于外，曰：惟我后之德。四曰：有孚在道，五日：孚

于嘉者，臣之衷孚所以明隨之義也。應於君，君隨

於善也。

上六拘係之乃從維之王用亨于西山

國語親民之結也民無結不可以固拘係之義也

詩緜纒維之比王之維持諸侯**詩**爲下國綴旒比

王之繫屬小國**周禮**小大相維皆從維之義也**孟**

子大王居邠狄人侵之邑於岐山之下居焉邠人

曰仁人也不可失也從之者如歸市非得民之深

者豈能使己窮而更隨之至於不可解乎人心固

結周之王業蓋興于此是亨于西山之謂也**禮記**

因名山升中于天是用亨之義也**左傳**聖王先成

民而後致力於神是維係民心用亨之本也

禮記

哀公問曰有虞氏未施信於民而民信之夏后氏

未施敬於民而民敬之何施而得斯於民也周豐

對曰墟墓之間未施哀於民而民哀社稷宗廟之

中未施敬於民而民敬殷人作誓而民始畔周人

作會而民始疑苟無禮義忠信誠懇之心以涖之

雖固結之民其不解乎維係之義通於用亨觀於

此而可知矣

象曰拘係之上窮也

論語

子曰從我於陳蔡者皆不及門也窮而相隨

夫子所以思其相從於患難之中也上窮之義蓋

取諸此**孟子**如七十子之服孔子也詩云自西自

東自南自北無思不服隨之義必如是而後極焉

三三
巽下
艮上

蠱元亨利涉大川先甲三日後甲三日

左傳

晉侯有疾醫和對趙孟曰蠱淫溺惑亂之所

生也於文皿蟲爲蠱穀之飛亦爲蠱在周易女惑

男風落山謂之蠱皆同物也案文從蟲從皿卽皿

蟲為蠱是也**家語**風為蟲凡蟲皆生於風是以山

風為蠱**禮記**其蟲鱗其蟲羽其蟲倮其蟲毛其蟲

介凡有血氣皆謂之蟲有生之類盡矣象蟲在血

中者凡物之害自外至者易防自內生者不覺取

義於山下之風亦以其隱而難見也**詩**蝮蝮在東

莫之敢指陰陽之淫氣即生於天也**詩**去其螟鱧

及其蠹賊禾稼之殘害即生於地也**禮記**蠹氏主

除鼃鼃赤文氏掌除牆屋壺涿氏掌除水蟲皆生

其中而自為害者也壤而有事蠱之名義精矣**禮記**

子生於其心害於其政發於其政害於其事以人事推之不可知幹蠱之道乎**周禮**秋官庶氏掌除毒蠱以攻說禴之嘉草攻之毒物害人蠱人之義也**爾雅**康謂之蠱米皮自壞自蠱之義也皆謂之蠱**周禮**翦氏掌除毒物凡庶蠱之事蠱之宜除壞極而有事之義也**左傳**秦伯伐晉卜徒父筮之曰乃大吉也三敗必獲晉君其卦遇蠱干乘三去三去之餘獲其雄狐夫狐蠱必其君也蠱之貞風也其悔山也歲云秋矣我落其實而取其材所以克

也寶落材亡不敗何待此亦解蠱卦之義蠱而元

亨者 **禮記** 為人臣下者怠則張而相之廢則墮而

更之謂之社稷之役極弊則將復興也 **書** 若涉大

水其無津涯壞極之象利有以濟之也 **禮記** 孟春

之月其日甲乙甲者日之始事之首 **禮記** 日用甲

用日之始也是其義矣 **穀梁傳** 六月上甲始庇牲

十月上甲始繫牲皆用甲之義也 **周禮** 正月之吉

始和縣治象之灋於象魏使萬民觀治象挾日而

飲之言從甲至甲是甲為布治之始也 **禮記** 立春

立夏立秋立冬先三日大史謁之曰某日立春立
夏立秋立冬天子乃齋此先三日之義**大學**湯之
盤銘曰苟日新日日新又日新此後三日之義古
人事在仁義故以甲庚爲用先甲先庚皆直取本
義爲正甲爲十幹之首卽交義幹蠱之所由取也
又先甲三日爲辛有自新之義**禮記**元日祈穀於
上帝是日之用辛者**左傳**原田每每舍其舊而新
是謀前事之終以自振盪之有事宜如此也後甲
三日爲丁有丁寧之義**禮記**上丁命樂正入學習

舞是日之用丁者**詩**誨之諄諄後事之始以爲戒
蠱之有事宜如此也舊說如此亦究以本義之甲
爲主也

彖曰蠱剛上而柔下巽而止蠱

國語有縱君而無諫臣有冒上而無忠下君驕臣
諂是剛上柔下也**論語**譬如爲山未成一簣止吾

止也始勤終怠是巽而止也皆所以致蠱之由也

蠱元亨而天下治也利涉大川往有事也先甲三日
後甲三日終則有始天行也

書永清四海垂拱而天下治極弊之後撥亂反正
故曰元亨而天下治也書若涉淵水予惟往求朕
攸濟有事之謂也禮記日窮于次月窮于紀星回
于天數將幾終歲且更始窮而必變終始天行之
義也穀梁傳卽位授受之道也先君無正終則後
君無正始也先君有正終則後君有正始也終則
有始卽爻所謂幹蠱之義也盡人事者未可徒歸
之天道矣

象曰山下有風蠱君子以振民育德

詩大風有隧有空大谷山下之風敗物之象所以
爲蠱詩習習谷風維山崔嵬無草不死無木不萎
此山風之蠱也書作新民振民之謂也孟子匡之
直之輔之翼之使自得之又從而振德之育德之
謂也書舊染汚俗咸與維新皆所以治蠱之義也
初六幹父之蠱有子考无咎厲終吉

禮記子也者親之枝也敢不敬與不能敬其身是
傷其親傷其親是傷其本傷其本枝從而亡枝附
幹而立子代父而行文言所謂貞固足以幹事者

也故曰幹父之蠶穀梁傳孝子揚父之美不揚父
之惡是幹蠶之義也禮記國人稱願然曰幸哉有
子百姓歸之名謂之君子之子是使其親爲君子
也是爲成其親之名也已矣有子考无咎之義如
此爾雅父爲考母爲妣禮記生日父死曰考考本
通稱承父言之則有死生之異也國語詩有之天
之所交不可壞也其所壞亦不可支也昔武王克
殷而作此詩也以爲飫歌名之曰支以遺後之人
使永監焉支壞所謂幹蠶也書蔡仲之命曰惟爾

率德改行往卽乃封爾尙蓋前人之愆無若爾者
之違王命慎厥初惟厥終終以不困不惟厥終終
以困窮此厲終吉之謂幹蠱之在初者所以戒其
終義如是也

象曰幹父之蠱意承考也

象亦分言父考者論語父在觀其志父沒觀其行
三年無改於父之道可謂孝矣是兼存沒而言之
也意承考者禮記曾子曰君子之所謂孝先意承
志諭父母於道是其義也中庸夫孝者善繼人之

志善述人之事者也善承其意卽極之達孝亦不外是也

九二幹母之蠱不可貞

孟子 凱風親之過小者也親之過小而怨是不可
磯也不可磯亦不孝也凱風不怨不安其室猶可
喻之於道是幹母之蠱者也知不可磯之不孝卽
知不可貞之義矣 **禮記** 門內之治恩揜義故曰不
可貞

象曰幹母之蠱得中道也

詩有子七人莫慰母心母氏聖善我無令人言之

婉而善入是得中道者也**左傳**鄭莊公以共叔段

之故遂置姜氏於城潁而誓之曰不及黃泉無相

見也既而悔之其去道也不已遠乎

九三幹父之蠱小有悔无大咎

論語事父母幾諫見志不從又敬不違勞而不怨

有悔者小无咎者大孝子之志也**禮記**父母有過

下氣怡色柔聲以諫父母怒不說而撻之流血起

敬起孝說則復諫過剛則小有悔巽而得正故无

大咎

象曰幹父之蠱終无咎也

孝經父有爭子則身不陷於不義故曰終无咎

六四裕父之蠱往見吝

孟子我無官守我無言責也則吾進退豈不綽綽

然有餘裕哉無事者可以言裕有幹蠱之責者不

可以言裕 **書**若考作室既底法厥子乃弗肯堂矧

肯構厥父菑厥子乃弗肯播矧肯穫厥考翼其肯

曰予有後弗棄基未成之緒尙不可裕況事之蠱

可裕乎 **禮** 垂裕後昆裕者貽謀之善以蠱為裕故

吝 **禮** 改過不吝裕則不能改矣故日往見吝

象曰裕父之蠱往未得也

孟子 詩云天之方蹶無然泄泄泄猶沓沓也怠

緩悅從此即所謂裕蠱之義也往未得異於往有

事者矣 **論語** 力不足者中道而廢往未得者其才

柔也象之巽而止者正謂此 **論語** 譬如平地雖覆

一簣進吾往也以斯而往豈有見吝者哉亦在人

之自勉而已

六五幹父之蠱用譽

卦凡三言幹父之蠱初曰厲三日悔此言用譽惟

舜禹足以當之**書**舜父頑母嚚象傲克諧以孝烝

烝乂不格姦舜之幹蠱用譽也**書**鯀則殛死禹乃

嗣興天乃錫禹洪範九疇彝倫攸敘禹之幹蠱用

譽也**禮記**父母雖歿將為善思貽父母令名必果

是用譽之義也

象曰幹父用譽承以德也

孟子舜盡事親之道而瞽瞍底豫瞽瞍底豫而天

下化禮記絲障鴻水而殛死禹能修絲之功日承

以德忘其為幹蠱者矣禮記善則歸親承以德之

義不止於意承考也孝經身體髮膚受之父母不

敢毀傷立身行道揚名於後世身不敢毀德不敢

敗皆幹蠱也幹蠱之義不盡以處變言故曰承以

德

上九不事王侯高尚其事

禮記儒有上不臣天子下不事諸侯是不事王侯

者也孟子士何事曰尚志居仁由義大人之事備

矣志卽其事故曰高尚其事**左傳**民生於三事之
如一君父之事一也**論語**長幼之節不可廢也君
臣之義如之何其廢之舊說有謂父母之責不能
辭國家之事可以謝者義未盡善君父一體未有
可以置身事外者**論語**不在其位不謀其政上九
之時才可爲耳**論語**子曰沽之哉沽之哉我待賈
者也**孟子**不見諸侯何義也孟子曰古者不爲臣
不見此所謂高尚其事者若屬之石隱之流則與
全卦之義不貫矣

象曰不事王侯志可則也

論語

隱居以求其志行義以達其道道在則志在

也孟子

伯夷非其君不事居北海之濱以待天下

之清也故聞伯夷之風者懦夫有立志故曰志可

則禮記

事君軍旅不避難朝廷不辭賤處其位而

不履其事則亂也故君使其臣得志則慎慮而從

之否則熟慮而從之終事而退臣之厚也易曰不

事王侯高尚其事觀此則蠱之上爻非言高蹈之

義益明矣